

嘉定事蹟備錄卷之十四

人物考三

列傳

宋



龔宗元字會之自吳徙邑之黃姑村舉鄉試第一天聖  
五年成進士初主仁和簿以父疾乞便養調吳縣已而  
改尉建安藹有聲稱以薦章保任者二十有二召入擢  
大理評事出知句容摘發若神楊紘持使節行部頗嚴  
峻屬吏望風投劾紘過句容獨不人曰龔君能治民吾  
往徒爲擾耳歷判衢越二州官至都官員外郎謝事家  
居作中隱堂時程適陳之奇皆以耆德致政宗元日與



爲詩酒之會吳中謂之三老

中吳紀聞作三隱

前官仁和時知

州范仲淹重其文以爲溫厚和平而不乏正氣似其爲人嘗曰君德業清修他日必爲令器慎勿因人以進宗元卒能絕跡權門以清直顯爲不負所知云子程程字信民剛正自守力排佛老讀書支硎山墓廬攻苦食淡博極羣書登熙寧六年進士歷官西安丞桐廬縣令卒贈左朝議大夫子况

况字濟之崇寧五年進士文學與蘇過齊名用其祖中隱故事自號起隱子著起隱集仕終祠部員外郎

孫載字積中治平三年進士除河中府戶曹更三守皆立戒嚴載獨侃侃與爭曲直守卒重而薦之中書檢正

官察訪關辟爲屬檄使按乾祐令不奉行青苗法者載言邑小民貧令實無罪弗果按遷知德清開誘是非出於誠信訟有累年不決者得一言感悟舍去熙寧中浙西饑縣獨熟載勸大家倍糴得十五萬斛明年米價翔踊使平直以糴全活甚衆移知考城諜告盜集境上尋以元夕掠近郭載不爲動張燈設晏如常盜叵測遁去迄受代無復盜者神宗嘗書載姓名付中書會有沮者不大用歷廣東河北河東淮西使者知海沂婺州所至有惠政稱循吏徽宗朝知亳州以嘗薦元祐黨人授提舉洞霄宮後以朝議大夫致仕卒載天資樂易好汲引士類受薦者至四百餘人後多知名少喜讀易著易



釋解五十卷詩法若干卷文集若干卷曾祖漢英仕吳越爲崑山鎮防邊使父傳入中朝終通議大夫叔父巒泉州節推嶽當塗令弟臨大理評事臨五子實寘騫察宙一宣德二文林三承事四監丞五承事而察尤以忠節顯自有傳

楊應龍字汝濟敏求曾孫有文武才爲戚里吳秦莊簡王壻孝宗在東宮親愛之寧宗朝官武功大夫兩浙西路兵馬鈐轄丐祠遂主管建寧府冲佑觀王袞王由皆以將帥薦未用而卒嘗著進授冊五萬餘言信齋詩稿若干卷子光輔承節郎

米字宗素居北城洪武中由歲貢薦授監察御史平反藍獄白註誤者三百餘人數言事調尤溪知縣先是縣里胥拘繫市民以集事米至釋之示以信義民安而事亦集復召爲御史出知兗州考滿民詣闕請留至九年調知紹興卒於任米學行純正爲治有循吏風從兄琮字廷玉洪武首科鄉舉知中部縣有惠政終府同知彭奮字孝常居南城取楷書入監永樂壬辰成進士爲御史執法不阿時鈔禁甚嚴命潛行廉察獲實以聞按邊將匿塞外貢馬者寘諸法數平反疑獄宣宗朝賜緋衣嘗以事被誣下法司訊治無驗宣宗笑曰朕知小彭御史不愛錢那有此耶出爲福建參政行法嚴峻爲部



民所誣落職歸年踰九十以覃恩賜冠帶終於家

陳述字宗理居真如宣德間以賢良薦授御史巡按江西歷浙江右參政移四川左參政會流賊聚衆剽掠官軍失利述至推誠招撫降者三百餘人並釋歸復業殲渠魁五十人其地遂寧已而德陽賊燒劫什邡安縣移屯彰明述統官軍以正兵當賊衝復出奇兵撓之所獲資畜輒以充賞不旬日悉平初蜀民不知力本述爲設法勸課數年之間農桑遍野民用饒裕撫臣累疏薦之述以年老致仕晉階二品蜀人立祠祀之

徐瑄字子敬居北城舉正統戊午應天鄉試第一乙丑成進士爲監察御史巡視京畿及山海關除奸剔蠹出按四川廣東所至有聲天順間廷議邊方要鎮不宜獨仗武臣屬大臣推擇壯猷重望者往鎮撫之內閣李賢尙書王翱馬昇推擇六人瑄從御史超擢右僉都御史巡撫延綏等處嚴斥埃繕甲兵督屯糧以廣軍儲葺學校以作士氣虜嘗入寇瑄督兵與戰於孛羅池溝又戰於半坡墩金鷄峪雙海子皆捷事聞賜璽書賚幣獎勞未幾丁內艱歸詔奪情起復不得已之鎮自是情鬱不伸兼以觸風霜得疾連疏乞休歸卒諭祭於家子嘒嘒字以質成化己丑進士由工部主事遷南刑部郎中獻獄平允出爲湖廣叅議專務與民休息然實精勤不爲一切苟簡嘗督餉至邊剷除姦蠹軍民便之以課最



攝左轄入覲人以為方向用竟上疏致仕蓋父子皆著  
勇退之節云四世孫纘先

纘先字孟新崇禎己卯副榜以特恩知天河縣境多猺  
獞盜且蠶起纘先綏蠻靖寇經畫有方地在邊僻歲賦  
任贏縮貪墨者恣谿壑焉纘先請於上官著為定則民  
繪像祀之遷知趙州全家遇兵死

范純字誠夫居羅店天順丁丑進士授南京兵部主事  
成化初以刑部員外郎出為四川僉事分守川北所轄  
番部道險前憲使案驗芻糧率移文勾當純親歷殆遍  
嘗督運至威州會蠻眾攻城甚急純用羌兵以計破之  
轉松潘兵備副使萬安在內閣其子肆橫鄉里輒繩以

法鎮守內官承旨市鷹鵠所過州郡索路費千金民不  
能供純白止之弗聽歎曰吾不能庇民可復仕乎即移  
疾歸同年彭韶巡撫江南素交厚絕不干謁嘗與同官  
某會飲酒半某與伶狎純遽拂衣出厲聲曰風雅掃地

矣其平生剛正類如此有詩十八卷文二卷馬元調曰  
純美丰容  
家四壁嘗為人訓蒙晝課生徒夜必挑燈自課旁舍有  
女子來窺悅其狀請留侍寢純為溫言以謝之詰明即  
其巾解歸值年儉內子紡織為供長不給幾於餒死及  
其年報人至擊其門大開見屋裁斗大榻於是竈於  
其後亦於其前不覺哭失聲意秀才貧無長物可  
簪也內子從容前諭曰汝何用憂秀才果中者牌坊  
人喜躍叩首曰真夫人真夫人

李良字堯臣由真如徙居邑城成化己丑進士為南京  
刑部郎治獄不務鉤距而善窮人情大司寇重之諸曹



疑屨輒決焉出知瑞州府瑞俗獷悍喜告訐繫獄多至千人良至釋其連坐與亡驗者而窮治其尤獄以衰息民多逐末率遠賈不歸良教之務農始相次復業值歲大祲爲長短補貸法全活甚衆以憂歸卒弟直字舜臣號癡仙成化十三年舉人兄弟齊名人稱二難

龔宏字元之號蒲川初居蒲華塘徙北城中成化戊戌進士除嚴州推官決疑釋滯金華有政一者子殺人不論服政二孳附嶺者舟陽往詆憲夜佚去以石投水曰子姪墮水矣且假獲屍焉營給公文輿歸七年不白事下宏問宏集衆詢政一子生男果否衆曰然幾歲矣衆曰汝死七年生男纔四歲甘未死無疑

矣坐以律一郡稱神入爲南京刑部主事選員外郎所治獄大小九百五十有二無不平允者出知兗州兗州借免糧寄養馬課糧萬石馬八千匹民不堪命宏照究遠年卷知爲額外特奏免竟屬令陳恃才不檢公庭撲之萍厠改行卒爲良吏後撫應天長跪謝曰微公孰能成我魯藩諸胥有爲狎邪遊者邈卒疑爲盜逮繫獄自縊死宗室羣噪將捽令殺之公知令賢陽怒收令下獄曰是不當請旨耶噪者散乃白當道調令去守竟六年入覲上旌治最賜宴錫服久之擢浙江右參政輿疾而南山東民遮道留者萬計至有嘯天祈祐者旣任念親老皆養歸補丁內外艱屏跡郊外躡都官員外郎中隱



祠部員外郎起隱故事構三隱堂板扉土垣日惟著書而已邑有大政事令就問知無不言家居十三年起爲福建右布政遷湖廣左布政廣有巨璫縱奴殃民宏命武昌守收逮守畏勢依阿宏親往獲首惡六十三人置諸法璫害以戢尋陞應天府尹有中使差往西域所過日費百餘金見宏不敢肆京師帖然丁丑黃河溢拜都御史奉敕總理河工河患底定巳卯又敕兼理運河武廟南征宏扈蹕時江彬用事銜宏不附巳陰令輓者伺宏河旁謁上擗蹟之曰舉失儀且曰何其大胆宏曰臣事陛下小心惟得罪江彬耳彬又曰此人老矣上不聽

宏宏一夕聯巨艦載土沈之口險塞彬計卒不行辛巳

進工部侍郎五疏乞休皆慰留冬再疏始獲允旨陞工

部尙書致仕著馳驛還鄉壬午嘉靖改元詔階榮祿大

夫一品玉帶三年遣官存問賜白金再踰年而卒賜葬

祭五世孫錫傳龔氏家乘宏生有夙慧甫四歲能信手

作書里人試之宏從垢几上盡塵爲天

下太平四字弱冠補邑諸生將送入泮之前夕坊老夢

有神趨令掃衢路曰有尙書至問爲誰曰驢者是比且

諸生盡乘馬

宏獨策一蹇

侯峒曾曰蒲川公生歷六朝治行爲天下第一治河有殊績數決疑獄若有神焉而不以智名終身介潔守郡六載病且死囊無十金而不以廉名三抗貴璫于武廟之世至削其黨奪其財竟無人敢動者而不



以節名退居十餘載累徵不起而不以高尚名善爲  
篇什著述甚多而不以文名

錫爵字汝修居東城萬歷甲戌進士初令永新舉卓異  
由工部營繕司主事改都水司時漕河歲決言治水者  
蜂起尙書潘季馴謂河強淮弱惟築堤束水用水刷沙  
可以濟漕錫爵力贊之迄用奏績滿九載遷廣東參政  
一日訛傳海南黎人將稱亂制府發兵錫爵謂島嶼小  
醜豈敢無故蠢動當先以尺書諭之及廉得其情知有  
山田四十餘萬頃爲強宗蠶食忿而思逞錫爵因清其  
疆理黎用輸服遷按察使廣西布政使俱有惠政卒爲  
強宗所中罷歸寄情林壑自號石巖仲子方中

永新有某尙書聲焰甚赫其子橫里中持令短長令  
視事時家奴環立左右一事不如意紛紛淬語前令  
莫可誰何錫爵逮繫治罪有至重辟者未幾尙書病  
且死更以子孫爲託錫爵卒護持其家

東塘  
口詞

石巖于仕途二十餘年林下亦二十餘年官成身退  
精采方盛享林泉亭榭之娛所謂石岡園者是也著  
有論語解老子注老子疏畧九九參易解華嚴經疏

畧諸刻

臨雲堂  
雜錄

方中字仲和太學生能詩有氣節周忠介公以璫禍就  
急徵方中無半面識奪筆縣簿呼號里門醵金伙助其  
勇於赴義類如此晚與程嘉燧馬元調締博古交郡邑



纂修志乘皆禮聘焉有詩文集并著南華注解杜詩解  
辨學撤部臥病漫語等書

浦鈇字汝器邑人以登州籍成正德十二年進士知山  
西洪洞縣入為監察御史值廷議大禮抗疏敢言復論  
尚書林俊陶炎已徵不宜中輟內官秦文已譴不宜復  
用武定侯貪恣罔忌請收其兵柄皆忤旨奪俸尋奉命  
巡居庸關多所建白念母老乞歸終養嘉靖七年起掌  
河南道事屆京察執法不阿失宰臣意罷歸再起巡按  
陝西先後條上便宜四十餘疏並軍政大計集全陝政  
要錄度緩急而行之最後疏救御史楊爵被逮下獄與  
同室獄吏頗侵之爵不能平鈇曰內文明而外柔順

比其時矣為御史二十六年再蹶再起卒死于獄後追

贈光祿寺少卿見侯開國吳嘯詩鈔浦公為嘉定第一流人物程志不為立傳無乃太簡

葛鏞字文振居南城成化辛丑進士為南京大理評事

明於讞獄嘗鞠盜疑其寃白寺卿釋之已而果獲真盜

丐者薛李二人迫潘良人婦婦自經里人王亮擊殺丐

吏逮亮抵罪臺部皆允鏞駁曰薛李死當其辜亮為匹

婦復仇可原也竟得旨論免他所辨雪多此類官終寺

正子昂字廷遠以字行博學砥行舉嘉靖壬午鄉試未

仕卒

李宗祐字吉甫其先福建甌寧人祖惠司教嘉定遂家

焉宗祐登成化甲辰進士官南京車駕主事歷員外郎



卷十四  
郎中嘗督造馬快船盡祛夙弊編管富戶絕不容私勒石水西門外著爲令性好客俸入恒不給宦久益貧後卒於官

楊瑛字潤卿一字栗齋居安亭成化丁未進士宏治初爲兵科給事中進掌科上疏請革弊政以保初治彈劾無所避嘗夜出遇貴璫爭道批其頰璫泣訴御前孝宗曰知是長楊故須避之久之遷太僕少卿與同官持奏不協出知常德府卒於官

楊錦字尙綱居南翔成化丁未進士官刑部郎中屢辨疑獄擢江西按察副使適寇起章貢株連平民鞠釋者甚衆晉廣東按察使卒錦歷任刑官宅心平恕獄無冤者

徐恂字信夫居南翔成化癸卯舉人知嵎縣鋤奸剔弊課最改知南靖值海寇薄境恂環柵爲壘募民驍勇者教之兵出擊賊俘斬數百人餘衆遁去事聞賜彩幣又以節縮之餘營建學校門牆齋廡煥然一新竟以勞瘁卒官縣故有過山錢爲民害恂至裁革未及著爲令卒之日民泣曰過山錢又自此始矣

福建志云在嵎縣嘗修縣志編清風祠錄

盧備字以和居南翔由歲貢

寧晉志作舉人誤

成化五年知寧

晉縣事循用古道修舉廢墮善於化善鼓篋者無惰業辟田野招流移寬恤租稅民多全活河久淤塞乃疏淪其汙潦引水灌溉至今爲利沒祀寧晉名宦祠

葉盛送



卷十四  
楊

沈子文明號東溟孝子輔之孫也居八都後徙城宏  
治壬戌進士授行人正德初擢刑科時閩人劉瑾擅政  
知紹家富有求不遂憾焉瑾欲誣潼關守將姚諫重辟  
乃遣紹往訊時科道奉遣必詣瑾取指俯伏庭下紹獨  
挺然趨入揭簾升堂瑾駭詫曰何物給事敢強項若是  
限限者久之紹往與御史杜宏及知府郭任會勘二人  
畏瑾未敢決紹乃手攬獄詞拍案起曰吾終不能殺人  
以爾人明日宏悟呼酒酌地曰願從公死獄上瑾大怒  
遂傳諫書同殺之下紹於獄杖幾死謫福建照磨未行  
至京謫戍寧夏瑾敗誅起紹例廬上簿歷

新昌令郴州守終廣東僉事著有東溟集從弟灼

灼字文燦號東岩正德戊辰進士授行人擢監察御史

清軍浙江巡按福建江西皆著風裁寧藩陰圖不軌灼

上疏首發其奸嘉靖初疏陳四漸一經筵輟講二詰責

言官三數逮有司四偏信內侍且曰朝廷刑獄內付刑

部部察院外付巡按按察司錦衣官校不宜輕遣指陳

切直世宗至爲動容以議興獻大禮不合與同臺句容

曹錕崑山方鳳同日乞休郡守胡纘宗鐫三高士姓名

於虎邱石壁著有東岩奏草巡閩錄族子陽

陽字復卿號見心嘉靖庚戌進士知沙縣綜核精明人

爲山真主帝學八章奉命清理畿內莊田奪勲戚宦官



隱沒者一千九百餘頃 上牧政十事巡按四川忤權  
相謫判裕州量移南康司理歷撫州同知廣信知府隆  
慶初方以卓異內召竟移疾歸從子紹僖

紹僖字廷和萬歷丁酉舉人爲蒙城教諭遷國子學錄  
禮部司務改吏部首揆葉向高其座主也居相隣比不  
一叩謁尙書趙南星每稱其清慎擢武庫司員外郎庫  
事有內廷惜薪司相關者魏瑞用事欲於柴薪常額外  
加派三萬金紹僖抗言帑藏如洗必不能加卒奪其議  
嘗奉命至杭西湖方建瑞祠浙藩邀遊湖上謝不往織  
監李實誣殺名賢亦修故事來謁紹僖心惡之辭疾弗

見

唐恩字天寵一都人徙居城正德甲戌進士知松楊縣  
縣在萬山中俗悍難治恩以愷悌得民心歲貢橙糕民  
苦額外苛索恩至改爲官辦廉潔愛民令家人紡織以  
供薪水監司交章論薦尋病卒推官萬奎檢其橐祇俸  
金三兩而已入 本朝崇祀鄉賢

恩操行廉潔保民如嬰兒冬惠政水旱禱祈皆立應  
及卒道路哭之

豐州志

沈璧字惟拱居西城父壽舉宏治乙卯璧舉正德丁卯  
父子相繼以易學名四試禮部不第乃就教諭得鄱陽  
未上以母喪歸服除積年久之陞建安知縣汀漳饑  
藩司徽州縣市糴轉輸之豐民旦暮死必得米是索



之枯魚之肆也第解銀米商隨之矣已而果然他縣糴者皆不及御史行縣未至十里停舟欲拷掠人索獄且不得方盛怒璧抗言曰卽至治所而不得則令罪也奈何責之中途且此亦非拷訊地御史愧屈無何御史來守蘇州語其屬曰沈建安非汝嘉定人乎汝曹學之不患不爲良吏也璧以考滿將入覲過家遂乞致仕監司方列狀薦之間而歎曰咄咄沈君負吾矣

金洲字士瀛居漳浦嘉靖丙戌進士知永康考滿入覲以病日改國子助教忤相張璁意復出知高邑所至清廉無絲毫取民父性頗卞有過心幾諫繼之以泣母病不食卽下不食卽下

初喪弟邁危疾竭力營視不寢者兩月旣貴其塾師病爲執使令百日無倦容平生邁志爲儒者與廣東湛甘泉浙右蔡吾齋山東王純甫江西夏敦夫遊崑山魏莊渠講學洲師事焉常曰寧無偶不可匪人爲緣又曰居業必自近克已當先難人以爲名言學者稱沐齋先生孫大振篤學好修鄉里稱善人

張情字約之號少峯居安亭嘉靖戊戌進士初任處州推官處俗健訟多匿名詞情嚴察之桀黠斂跡其治務解釋疑滯不以操切爲名奏最當入覲以金鄉磐石二衙久相構情留反覆開諭入計後期僅授刑部主事尋改南職方職方多羨餘吏以進曰此會計所不及情拒



不納歷駕部郎首增馬快船工料而寬責其贏減京營  
餉馬之額又以馬頭困於守支立法通融皆爲永利出  
知九江會調三峒兵備倭所過縱暴情郊勞飲食之境  
得不擾取魚陂直築六門不費民一錢五年遷福建福  
州兵備副使倭寇方急提一旅抗之先後斬獲數百人  
遂解連江之圍以病告歸築不負碧山樓自爲文記之  
歷仕二十年以廉自持及卒無以備後事子應文應武  
應忠號清河三公子

張意字誠之情之弟少從兄學嘉靖戊子己丑聯捷登  
第授工部主事遷郎中擢山東按察司副使意性簡略  
見御史無加禮御史銜之會獄有稱貸不償購娼奉之

誣以奪其妻者御史遽欲當以強奪罪意爭之曰實娼  
也法不當死御史怒不應意亦拂衣出交章相劾以是  
去職後御史至者竟出其人於死人始稱意伉直云意  
之歸也裝橐蕭然如其爲諸生時會海寇起徙居西城  
名所居曰四餘并其身爲五因自號五餘翁又二十年  
而情始告歸白首兄弟徜徉林壑人皆羨之好佳山水  
罷官後布帆席帽往來吳越遠至黃山白嶽九華雁蕩  
靡不探討著作益富

龔有成字子完居四都學於歸太僕不攜臥具講誦達  
旦倦極假寐而已嘉靖丁酉舉於鄉兩上春官所與偕  
者皆以疫死同舍爭避去有成獨留視醫藥死爲含斂



護其棺以歸士莫不高其義焉謁選為漳州詔安令邑在嶺海之交倭難方發界中盜亦蜂起左右多為賊耳目者令欲有所為輒傳布賊中有成陰致賊首諭之令縛盜自贖於是盜怖爭解散而倭益至城中或為內應匿倭賊大櫃中伺者以告夜掩捕之并得同謀者二十餘家盡誅之倭乃遁去在縣七年會贛之龍南三巢賊方張福建江西撫臣會請調為龍南令有成以賊皆編氓雖出流劫未嘗殺官吏掠府庫可撫而定也乃親歷其巢曉以禍福賊率妻子號哭請命競獻飲食皆受而嘗之寢處巢中凡數十日賊大悅願輸田租編里甲令子弟入學出所虜子女由是終任無為盜者進贛州府

同知前後治縣事凡十三年兩以卓異時薦會憂歸服

闕入朝無復知其事者矣補萊州府同知後遷蜀府長

史致仕年八十餘卒

漳州府志  
各宦有傳

唐愛字良德居婁塘家貧力學中嘉靖辛丑進士令南

安治行為八閩第一邑隸泉州泉阻山濱海設重兵其

餉均諸七屬邑他邑民多詭入竈丁戶漸減餉不能給

而南安在山谷間不煮海監司見戶口如故議以他邑

兵餉借編於南安民不堪愛請於上官願代他邑勾稽

於是欺隱者畢出晤嶼水寨去三百里歲輸粟萬石其

軍弁率與牙僧通苛索無饜愛力請平價輸銀俾自易

粟著為令擢職方郎出為四川僉事浙江參議遷雲南



詩字思重居禮曹時郎有同姓名者獲譴已而禮曹疏  
列學詩名上數問此郎尚在耶意譙讓吏部故易今名  
始釋褐爲職方主事咸寧侯仇鸞新寵受命築城外八  
堡多以私人胥食學謨董其役盡汰去又扶其用事掾  
鸞大恨故工畢敘勞削其名賞不及旋改稽勲入直內  
閣大學士嵩屬以青詞辭不撰內艱服除補禮部主事  
進員外郎中先後在部十年鬱有清望議者以爲蘭臺  
祕閣之選竟外補爲荊州守荆之興山有高鷄寨賊數  
千窟其中縣令中賊餌不以聞乃以事繫令急發兵擊  
賊且遣辯者諭以禍福一日降三千人而誅其不降者  
山谷悉平景王封德安以國小多請膏腴地自益荊州

沙市亦在請中遣其國宦者來受地學謨從容言祖制  
親藩歲祿外不侵民利且沙市荆之以爲府者王安得  
請之爭辨甚力不得復說以受地不如輸租願歲以五  
百金奉國費王劾奏荊州守抗旨無人臣禮有詔逮問  
民遮道慟哭御史持之得末減免歸後沙市卒輸租云  
隆慶改元起爲南陽守遷湖廣副使分巡襄陽或誣遼  
王有異謀實出柄臣指學謨獨白王不反被劾罷萬歷  
初再起湖廣按察使遷副都御史撫鄖陽一意安集郎  
人德之入爲刑部侍郎晉禮部尙書時上旣營壽宮干  
進者數言吉凶冀售其說學謨獨謂車駕一出費且不  
貲此曹何所見而紛紛不已因罷之反爲異議者所整



遂乞骸骨歸卒賜祭葬如制學謨平生持正守官常依  
大體南宮事與司禮監表裏而馮保方柄事及保敗籍  
其書記大臣不與通者七人學謨其一也其詩文推制  
作鉅手著述甚富首建漕折議尤爲桑梓百世之利子  
兆曦字孺旭兆稷字孺穀俱國子生以詩文名兆曦子  
元嘏

張楸字子培居南翔少墮井中有神人扶昇之得不死  
嘉靖庚戌成進士知福清廉明仁恕丁外艱補孝豐其  
民採礦率阻險爲賊楸務以德撫柔黨悉解散復均田  
賦以寬貧民遷南京職方主事南京歲造馬快船畿輔  
及江西湖廣積逋料價銀八十餘萬楸贖救往按之凡  
歷三十餘郡無敢以私恩者道遷車駕司員外過家謁  
母欲移告未及而卒楸孝事嫡母貲產悉以讓弟沒之  
日篋中祇二十餘金

沈人种字時雍居西城嘉靖癸丑進士初知德清有聲  
入爲吏部主事出歷浙江副使山西雲南廣東福建藩  
臬再入爲光祿太常卿又以副都御史出巡撫福建其  
治以精勤嚴核爲用而所至必以惠愛稱嘗勝於廳事  
曰吏不畏吾威而畏吾之廉民不愛吾寬而愛吾之嚴  
所設施可槩見矣先後備兵關東西嘗攝諸司事至佩  
七綬塞外憚其名不敢犯朝廷聞之有白金彩幣之賜  
其在浙也溫處二州盜起不在部界而遣丞督兵以往



出賊不意一時駭散及撫閩以無子鬱鬱得心疾卒

王圻字元翰號洪洲其先本姓陳爲嘉定富室洪武時徙雲南留少子育於王姓因姓王由上海籍中嘉靖乙丑進士令江西之清江邑田糧多欺隱圻出令丈量躬歷阡陌勾股稽筭圖冊旣成罔敢作奸尤銳意右文置學田增號舍鑄祭器以最調劇萬安徽入爲御史論中官罪及邊臣欺罔前後與新鄭俱不合遂謫判邛州改知曹縣遷守開州州故有十萬之稱圻獨廉潔自守移貳青州旋擢楚臬督學政晉陝西參議年未五十遂請歸養居王菴在嘉城南三十里爲上海三十堡田最汗

役同里之民免于力役者五十年天性孝友三黨之喪

不能葬壯不能娶孤寡不能養者俱仰給焉其居前

種梅萬樹因號梅花源中有歲寒亭爲著書之地門

皆安硯席著述最富年九十五卒祀上海鄉賢

令清江事本江

西志餘俱趙志兼  
叅靜志居詩話

陳其詩字汝正居七都少穎悟年十三卽通經史舉嘉

靖甲子鄉試選授廣宗教諭學者稱爲再來安定遷知

黃梅縣三月丁內艱去任然百日之中便能爲地方興

革三大事楚人作三事迹以識其德服闋補山東新泰

令時縣苦亢旱其詩禱於泰山夢神人授以杯水質明

大雨曠賊王邦傑嘯聚官山討之不克其詩親詣其寨



撫降之有死囚赴決道逸監司將罪令囚聞之曰吾不  
可以負賢令君遂就死後降山東鹽運司知事卒於官  
其詩賦性至孝父嚴厲居官時猶數孑杖小有不憚其  
詩卽率妻子長跪請罪俟父解顏乃起子孫化之家風  
甚謹長子所志事繼母亦如其詩之事父至老已華髮  
談及其父必流涕漣漣不能自止

侯堯封字士隆又字欽之居諸翟市徙居西城隆慶辛  
未進士由刑部主事改監察御史清軍江西胥史不得  
以勾攝爲奸利繼按福建劾受財鬻獄者乃權貴私人  
也左遷湖廣僉事備兵蘄黃蘄盜出沒江中防江兵素  
怯不敢覘盜堯封至則置樓船嚴斥埃扼要害而搗其

穴盜悉平蘄民阻大同山者藏亡逋賦法不得行衆欲  
勦之以爲功獨持不可遣能吏往諭之令其子弟受學  
遂爲良民初堯封登第出張居正門其母道經蘄供億  
無加等又上書諷其奪情且言吳中行趙用賢不宜受  
杖尋改備兵襄陽城臨漢水其西面獨庫且壞卽鳩工  
增築修老龍堤以衛之甫畢而江暴漲平地水高二丈  
城得不圯以城外居民偏受水害賑恤尤周水旣退又  
增城實堤築二石梁以通峴山衆以爲迂明年水益大  
至新版不沒者僅尺許城外民由石梁得渡者無筭時  
堯封已丁母憂去民立祠祀之後補大名值大祲勸分  
發粟修築陽平堤三百里如其蒞襄陽時遷福建參政



致仕堯封年五十七始通籍所至皆以廉稱在福建時嘗署藩長事守藏吏白金錢可支用者若干正色拒之及歸蕭然約素然其待族屬卽疏遠必加恩焉有鐵菴

遺稿西臺奏疏水利志歿祀鄉賢子孔詔

臨雲堂雜錄堯封爲諸生

家貧力學向機杼下分母夫人織光下上今古倦則舉酒自勞酒罷或吟小詩或老萊其舞博笑爲適日則向竹林結茅廬啜晤其中積有年足腫鍼之下斗水乃愈

愴然曰吾兩得危疾賴父母以復吾矣因自號復吾

秦立曰堯封家法嚴肅有媳華氏與其孫婦龔氏偶爲葉戲剪寸草爲籌堯封登樓倉皇歛避遺莖草地下堯封呼其子及孫跪而訓之旬日後赴任諸子婦

拜別堯封曰八娘子大娘子且勿見其後龔氏嘗言

至今思之毛骨悚然也堯封天性純孝母朱宜人就

養襄陽一日將出視事宜人偶以小婢觸忤不釋而

臥公冠帶跪牀下必候其母一笑乃起已報移兩時

矣

孔詔字孟宣號一貞萬歷歲貢生以子震賜貴累贈吏

科給事中華亭陳繼儒爲立卓行孝友傳有龍江剩箋

弟孔階字延之號蒼生能詩善書著有博笑編齊雲紀

游避暑餘談皇明世說鈔明霞閣雜著

侯震賜字得一又字起東萬歷庚戌進士授行人天啟

初擢吏科給事中是時保母奉聖夫人客氏方擅寵與

魏忠賢及閣臣沈灌相表裏勢燄張甚旣遣出宮而熹

宗思念流涕至日肝不御食遂宣諭復入震賜疏爭謂



禮有慈母君命所使教子也魯昭公慈母死欲爲之練  
冠有司執論乃止夫古有慈母職兼教養猶恩以義絕  
何況今之公席 婦其可數昵至尊哉女德無極高明  
不祥陛下卽爲客氏富貴計亦當早加裁抑曲示保全  
不宜格外隆恩以寵而益之毒且陛下始而徘徊眷注  
稍遲其出可也出而再入不可時時入尤不可官闈  
禁地姦璫羣小率睥睨其側內外鈎連則借叢煬竈有  
不忍言者昔王聖寵而煽江京李閏之奸趙嬈寵而搆  
節王甫之變禍貽宗社良可寒心此陛下殷鑑也疏上  
讓震賜沾名卒不省會遼事方棘經畧熊廷弼巡撫王  
化貞兩人者不協數持論相牴牾兵部尙書張鶴鳴頗

右化貞議者遂欲移廷弼與化貞畫地任事震賜逆知  
其必敗疏謂事勢至此陛下宜遣問經臣果能加意訓  
練則進止遲速不從中制雖撒撫臣一以付之無不可  
者有如不然則督其明白回奏以聽處分收拾殘局專  
任化貞此一說也不則移廷弼於蜜雲而出本兵爲經  
畧鶴鳴威望素著慷慨自命與其事敗同罪不若挺身  
報國此又一說也本兵如不可出則遂以經畧授化貞  
另擇沈深有謀者代爲巡撫以資後勁此又一說也不  
則直移廷弼於登萊以終其三方布置之策與化貞水  
陸相犄角此又一說也若復遷延猶豫決償國事於是  
方有旨集議而廣寧陷矣化貞廷弼相率遁入關門猶



數奉溫旨責以戴罪立功震賜大憤懣再疏謂臣言不幸驗矣爲今日計論法不論情河西未壞以前舉朝所惜者什七在化貞今不能爲化貞惜也河西旣壞以後舉朝所寬者什九在廷弼今亦不能爲廷弼寬也策撫臣者謂宜責令仍赴廣寧聯屬西虜然而層庫已竭其能赤手效包胥乎策經臣者謂宜仍責守關然而所謂守將如廷弼前議三十萬兵數十萬餉以收全局乎抑止招撫殘卒之關外以始示不殺乎凡此無一宜者廟堂之上欲行法則牽於情欲徇情則制於法及今不早定逃臣之律殘疆其奚賴焉其後治失事者罪蓋略如震賜疏云已遂料問臣沈淮結納奉聖夫人及諸中官

爲朋比且發其搆殺故監王安狀帝大怒命調外任繼又鐫二級以歸震賜任吏科纔八閱月章數十上其大者率係國安危治亂詞最切直爲小人所深憚竟用是得罪去然訖莫能害也及震賜歸未幾而黨禍遂大作矣越五年卒於家其明年爲崇禎元年子嗣曾以主事奏曰先臣震賜用狂直得罪先朝幸遇陛下復官而先臣已不及待先臣觸忤權奸持忠入地倘得死事諸臣其沐殊恩死且不朽特贈太常寺少卿祀鄉賢凡三子

嗣曾與岐曾最知名

從明史

張恒字伯常號明初由江橋徙居南城由上海籍中萬歷庚辰進士知茶陵興國二州入爲刑部副郎恤刑浙



江多雪冤獄冢宰陸某以重囚屬免卒按如律晉正郎  
出守建昌爲政務清簡片言折獄建昌人稱爲張半升  
言候鞠者不煩宿春也盱江故有橋稅中璫議加額恒  
白巡撫夏良心以太守例入羨金五百兩歸之公帑稅  
得不加秩滿遷臬副分巡南昌閣臣家與民爭湖利兩  
臺檄議恒毅然曰相國何藉此決歸民晉藩叅以母老  
旋乞終養歸沈默著書剝心理學經術晚年復有得於  
道家之言年七十臨沒神明湛然祀江西名宦本邑鄉  
賢著有明志稿恤刑題稿等書

殷都字無美一字開美號斗墟子居北城工詞賦有盛  
名於時萬歷癸未成進士年六十矣知夷陵州州當楚  
蜀孔道羣山造天徑纔容足行者魄悸乃鑿山開道九  
千丈遂成坦途蜀鹽例不得入楚販者常以風雨夜操  
小艇出峽稍不戒人船俱沒都謂步擔易米律所不禁  
皆縱舍之遂無冒險者課最擢職方員外遷郎中時火  
落赤起燬西陲借擠力克爲聲勢都謂二寇不相爲用  
不當急之使合與羣議左而執政深以爲然果次第解  
去邊葵會獵黃鵠口謀報寇至尙書石星請發兵乘城  
都曰獵也不宜輕動以損觀聽已而果獵星內慚諷言  
官劾之左遷歸白號海岱放浪詩酒家貧甚餽粥至不  
繼著有爾雅齋集十笏齋稿尺牘籌邊疏稿酒史歿祀

鄉賢



嚴貞度原名佩環字茂肅居十一都獨學無師而所爲  
文自出倫輩成萬歷癸未進士知東陽縣又以刑部員  
外恤刑浙江改職方郎會遼東總兵馬林爲太監高淮  
誣劾謫戍度以非其罪與同官力持之神宗怒以爲阻  
撓礦稅斥爲民初度以門下士受知閣臣沈一貫在部  
曹時朝士欲因以先容者而曹務之暇輒逃於酒衆以  
湛飲去之不知其中之落莫也歸而賃屋以居貧不能  
自給沒無以歛天啟元年贈尙寶司丞賜祭著有恤刑  
題稿

時偕行字汝健號乾所婁塘遷居北城萬歷癸未進士  
歷宰確山長興諸暨定海所至有能聲擢御史時饑饉  
半天下倭警日聞偕行條陳八事曰收人心廣儲蓄清  
軍伍覈募兵選民壯勤訓練嚴軍令儲將材疏糾尙書  
石星經略宋應昌顧養謙將軍李如松等誤聽朋奸媚  
倭辱國會雷擊西華門復請時起居以和聖躬納忠諫  
以和百官明職掌以和兆民散財賄以和邊境皆根本  
至計天下稱名御史旣而巡按山西旋奉嚴譴罷歸蓋  
追論巡城時事爲言官吳文梓等誣劾也家食二十年  
卒天啟改元卹贈光祿寺少卿所刻世範志學及空元  
說皆毀於兵火遺詩一卷其孫納手輯

李先芳字茂實居邑之南里父汝節字道亨嘉靖乙丑  
進士知安吉州嘗築石堤三十里以捍水患理冤獄失



鄉貴人意稍遷順德丞入爲刑部員外左遷饒州倅改  
登州丞招海島所聚逃卒歸伍事聞賜金後告歸先芳  
登萬歷己丑進士初官中書擢給事中神宗嘗詢讓冢  
宰先芳疏言待大臣當以禮有武臣謀柄錦衣又言其  
家貴盛勲戚莫比宜折其萌芽常州人輓輸至京米未  
入倉嚴旨譴責又言小民道途勞困直以官吏需索過  
當不滿其意故被重劾願上裁之皆不報而在廷以爲  
知大體緬甸在西南彝中未嘗侵叛會與三宣構怨小  
相攻殺而倖功者自詭緬甸不足平遂用二十萬衆討  
之勞費數歲雲南騷然先芳言蜀之播滇之緬皆不足  
勤王師乞赦邊臣無敝所恃以事無用事後人益思其  
言遷四川參議未半載卒先芳留心於經世之學通達  
國體未竟其用子繩之另有傳

歸子顧字春陽一字貞復初名顧啟元後復姓居西城  
萬歷戊戌進士由中書舍人擢工科給事中會正陽門  
樓災上疏切諫其略曰今天下事之最大而急者無如  
青宮講學而最可虞者無如章奏不下青宮輟講六年  
矣中外惶惶朝臣請之不得禮臣請之不得南北臺省  
諸臣請之亦不得及闕寺出一言利之疏則朝上夕報  
夕上朝報是不且輕國本而重傷天下之心乎章奏一  
切寢閣則是非邪正不復有所別白進退子奪不復有  
所剿裁安危緩急不復有所倚伏遂使政體鬱於上仕



路鬱於下財鬱於帑囚鬱於獄此四鬱者非所以滅凶而召和也洪範曰肅時雨若蒙恒風若漢書五行志曰王者嚮明而治則火得其性而不爲災火爲鬱之神今鬱結成習遠於肅而近於蒙故旱魃未除炎火繼作陛下何不仰體天心一日盡舉實政首令皇太子出閣講學亟發一切章奏以銷去天下之鬱如此則何禱不應何災不禳豈不鞏宗社無疆之福哉閣臣王錫爵見之嘆曰真諫官也時神宗春秋高福王未之國小人睥睨兩宮間廷臣爭立門戶四方連歲水旱國用漸絀子顧請飭綱紀以覈實效釋門戶以破嫌疑召致舊臣趙南星郭元標等以定國論速完福藩府第趣遣之國以一羣心蠲賑災傷之民以培根本節水衡浮費絕方士冒請以足國用又言天下亂形已成陛下豈以臣言爲未必驗而不信耶惟無驗驗則不可爲矣榮夷歛怨之言言驗而周轍不復西黨錮瞻烏之言驗而漢燼不復然范陽之釁旣作而嘆九齡之先見則已晚靖康之難旣發而繙陳瓘之抗疏則無及人臣甚無樂乎言之一驗而居先見之明人主亦何苦峻却過激之言而掇必驗之禍哉疏入不報然神宗雅知子顧嘗題歸佛子三字於御屏蓋京師以其恬淡寡欲呼爲佛子語徹禁中故也子顧素不樂仕進上諭羣臣以門戶爲言又上疏言門戶者朋黨之別名祇因皇上靜攝上下隔絕大臣言



官彼此相猜豈國家之福宜將章疏批答使內外洞徹責大臣言官各修職業則人情自和議論自省在諫垣九年隨事規諫反覆深切疏多留中執政者亦多不喜之始陞尙寶司卿歷太僕寺少卿熹宗立遷南京太常寺卿轉南京通政司使數官皆冷曹名遷而實抑之時璫禍已萌芽子顧亦病且老遂上疏乞骸骨歸詔加刑部侍郎致仕歸而璫禍益熾鈎黨徧天下前所言皆驗熹宗崩懷宗嗣位喜曰天子明聖老臣死瞑目矣踰月卒性至孝母病失明跪而舐之百餘日夢神語以某日痊至期果驗嘗薦一外吏吏藏千金以進大恚亟還之巡視節慎庫奏上羨餘四千金宦成無屋以居須之彥假以數椽居之客至麥飯葱湯坐論經史充如也子顧爲有光族子文章師法有光著有詩文集及玉垣奏疏等書歿後子鑛詣闕陳請得賜祭葬家貧遷延至 國朝順治十年始克葬祀鄉賢

孫元化字初陽八都徙居邑城天資異敏好奇略師事上海徐光啟受西學製軍中火器尤精舉萬歷壬子順天鄉試天啟二年計偕入京上書當局言邊事吏科侯震賜薦其才從軍邊左時經略爲王在晉元化策皆不聽閣部孫承宗行邊深知之奏授兵部司務旋入爲職方主事時疆圉多故軍書旁午條奏悉中機宜中樞倚以爲重會袁崇煥撫遼詔往計議事竣還朝有貂皮蟒



服白金文綺之賜魏闈諷其附已當大用元化正色拒之遂矯旨奪職崇禎初起武選員外郎遷職方郎中袁崇煥亦再起以兵部尚書督師乞以元化自輔陞山東布政司右參議兼整飭寧前兵備燕薊東西被兵連告警諸路赴援者輒潰元化善用關東將卒所向有功守撫寧救開平復建昌灤州永平遵化其所隸八城二十四堡四百里之邊屹不動以功陞僉都御史推遼撫會皮島劉興治作亂改撫登萊先是崇煥計殺東江將毛文龍議撤海防及元化受敕有援遼恢金復蓋海四衛之命元化具疏力辭謂今日大勢宜從廣寧進取一旦去累年所備器甲所練營伍所撫士民所修城堡而就無一事可因之地何以立功且登萊阻海往來非便軍機緩急風汛難恃接濟調發俱不可必疏陳不聽遂赴任卒定皮島亂既而大凌河告急命悉發兵往援部將兵至吳橋縣令畢自寅閉城激變反攻登州初遼陽受兵其民奔登州者十萬人至是衆關爭出城遂潰元化率從官巷戰死者十九人元化自刎不殊亂兵見之莫敢犯者因招之降東撫余大成亦具題得旨令招安而巡按王道純匿詔久不頒兵復亂元化歸朝待罪亂兵復破萊州首輔溫體仁論元化大辟臨刑西市風雷起足下黃霾翳日徐光啟在內閣謂體仁曰此足明登撫真寃矣子和鼎和斗和京



和鼎字九實號穎菴元化長子積學工文爲邑庠高材生元化蒙難和鼎不復應試著有春秋義例通考經史論辨 手輯其父之文集百卷紀事數十卷州居部次始與明史相表裏每日展卷執筆輒嗚咽不自勝書甫成病卒

和斗字九野號鍾陵野老元化仲子篤於孝友乙酉後謝諸生理名著述不關世務元化部將皆爲侯王延致之或勸之仕不應食貧退隱泊如也至經理侯根臺家事脫陳黃門遺息尤有古人風所著有東周通紀三傳分國紀事書學聖蒙石鼓文辨證國卹家寃錄以子致

彌貴贈翰林院庶吉士

府志列

和京字九牧元化幼子亦諸生侍元化於獄元化死西市頸血濺地和京伏而舐之盡觀者無不流涕乙酉城破夫婦殉節忠孝義烈萃于一門

國朝

孫致彌初名颯夢人書致彌二字示之更今名字愷似號松坪元化孫和斗子家貧好學才情藻逸尤長於詩康熙戊午以大臣薦和 御製詩四十韻稱 旨遂以太學生假二品服爲朝鮮副使購藏書輯其國中人詩爲采風錄行世是年中順天鄉試與修 幸魯盛典戊辰成進士選庶常旋以蠲漕權大獄幾不免閱十年盛典告成得復職授編修壬午典試山西陞右春坊右中



允轉侍講晉侍讀學士尋充纂修佩文韻府總裁其纂  
修勤且久考核詳慎書垂成而卒賜金以殮 敕內務  
府護喪歸里爲人慷慨樂易好獎掖後進有前輩風著  
述甚富詳藝文攷

趙俞字文饒號蒙泉康熙戊午歲貢是秋鄉試中式戊  
辰成進士文章風行海內莫不推爲老宿以蠲免地丁  
事籲巡撫奏聞與孫松坪與有勞奸民構大獄羅織兩  
人俱削籍久之公論伸復進士知山東定陶縣定陶多  
淫潦民竄徙不常乃度地濬爲三渠築堤雜植桑棗耕  
以蓄泄旅以休憩先是草竊被擒者輒私置之死公曰  
小盜無死法第按法治之可耳亦未嘗有所縱舍爲治  
五年務以文學化導諄諄勸民無鬥訟風俗爲之一變  
已卯分校鄉闈得士五人登第者四以老告歸倡淡成  
社教掖後進學者稱蒙泉先生詩文淳古樸茂有紺寒  
亭集

張雲章字漢瞻號倬菴又號樸村太學生世居橫港晚  
遷南城居父喪幾至失明奉母垂四十年老而孺慕撫  
教四弟俾各有立少受業上海朱瀚善詩古文湘潭陳  
公鵬年爲序其集嘗從清獻陸公問學以廉隅自砥礪  
興化李總憲柎延至家園補葺其先人映碧先生所增  
注南北史闕七載始成張清端伯行素重其文行時總  
督倉場留上潞河書院康熙癸巳九卿薦徵至京預纂



修尚書館訖事告歸雍正癸卯舉孝廉方正辭不赴有  
樸村集行世年七十九門人私謚端文嘉慶十四年崇  
祀鄉賢

張鵬翀字天屏一字抑齋喜讀南華經自號南華幼時  
應童子試未得題先將虛字錯落寫入卷內既而作文  
填湊之字字妥協未嘗起草也雍正癸卯中經魁丁未  
成進士由翰林院檢討典試滇南晉侍講又主河南鄉  
試陞詹事府詹事兩朝知遇特隆屢進詩畫賞賚書  
幣器物甚多恭和春林澹靄圖原韻御書雙清閣匾  
額以賜并賜詩云太痴更擅坡仙筆勁敵江山兩不漸  
居平捲簾隱几脫落塵縛雙眸秀發修眉飄蕭望之疑

有仙氣古今體文俱妙詩更擅場書法似東坡畫宗黃  
鶴山樵論者咸謂其有鄭虔三絕而敏捷過之爲詩觸  
事風發卽景泉湧不假構思或晨集采殿或候駕  
午門同館環堵每喝一韻立成數章皆工麗絕倫朝野  
傳爲佳話乙丑給假歸御製送行詩賜之至德州  
卒於途次年五十有八有南華詩鈔二十二卷嘉慶十

三年崇祀鄉賢

張庚畫徵錄以鵬  
翀爲畫苑之後勁

張照曰余嘗與南華散仙同奏事乾清門下候

指揮欸語偶攜一漢製白玉羊小如豆與其玩南華  
乍見稱賞曰詠此可乎卽說四十字若誦古余驚嘆  
曰技至此乎語未畢殿角割然聲震各驚顧乃四



奄舉一大米繩斷墮地碎且迸南華又曰詠此可乎  
卽復說四十字若誦古余惟稽首作禮而已

沈德潛曰南華張先生官於■朝矣人因其氣之清  
品之潔才之高以仙稱之南華亦自以爲仙弗却也  
愛佳山水裹糧往遊糧盡而返無擊戀喜奕不求勝  
人客至常脫粟飯客辭亦不强留爲人作畫十數紙  
頃刻盡或終歲不可得綜其生平取適而已長于韻  
語興到每得三四十篇嘗借衆詞臣試■殿廷未亨  
午有投卷者衆曰必南華也眠之果然予偶於坐間  
見其詠雁字律體詩不半日上下平韻俱就不卽不  
能與寄微遠卽生平詩可知矣與人論畫謂右丞董  
巨蕭散閒逸全以韻勝後代精工嚴整無一筆無成  
出然彌近彌遠指點畫理無非詩趣自道所得評者  
不能異詞或曰南華金門大隱似東方生或曰豪氣  
似太白或曰超曠似子瞻而齊物我忘寵辱仍似漆  
園散仙讀南華詩者遇之人間烟火外可也

王鳴盛字鳳喈號禮堂又號西莊晚號西泚乾隆甲戌  
進士殿試第二人及第以大考翰林第一由編修擢侍  
讀學士尋陞內閣學士兼禮部侍郎典試閩中以多用  
驛馬左遷光祿寺卿少時爲文汪洋恣肆蘇海韓潮才  
氣之豪直欲推倒一世不但辟易干人也通籍後專心  
撰述經術則宗鄭康成博古則學鄭漁仲泰山北斗海



內仰之丁憂回籍不復出山移居吳門洞涇草堂不與  
當事通謁惟好汲引後進有一篇一句之工獎賞不去  
口或評選其佳者梓而行之所著有尙書後案十七史  
商權諸書年六十八兩目忽瞽閱二年得吳興醫鍼之  
而愈著書如故嘉慶丁巳循例重游頻宮壽七十六而  
終葬虎邱山半塘橋北子嗣獲字斂夫少補諸生好學  
能文著讀經隨筆實菴漫草

嘉定事蹟備錄卷之十五

人物考四

儒林傳

明

殷子義初名養浩字集卿家新涇里少英敏性凝重比  
長卽有志聖賢之學年十六補諸生授經里中各質疑  
義無不響答其學專主考亭而溯傳於孔孟嘗居龔氏  
之塾有儒生翩翩由賓階來謁子義延之上坐生有所  
證子義卽扣其兩端竭焉生矍然起謝曰先生非吾友  
也請執弟子禮子義竟無所讓席時生年已衰然出諸  
弟子上矣它日有所應對卽宜呼其名或勸子義盍少



貶損子義曰孔子未嘗以字稱門人某安敢自壞其家法耶下帷垂四十年其後諸弟子有以其學致通顯者見子義猶粥粥如執經時也尤篤於孝友少失恃事後母最孝內外無間言已而後母自有子子義撫而教之如同母弟會父罷廢著家居無聊子義歲所得膳餼束修悉納之父以營朝夕一錢尺布不入閫帷也嘉靖中江南兵興新涇之第燬於賊始徙入城中僦屋以居又數困塲屋貧益甚乃奉二親養每食必有酒肉父不能飲則日計酒貲獻父爲壽務得其歡心不給則寧稱貸益之而自奉簞瓢晏如太守成安蔡國熙察子義孝廉延致郡齋比於古之更老日相與諮議政學子義卽知無不言然未嘗一及其私時子義趨次貢而正貢生資卽先子義乃廩歷稍後或風乘太守故盍白之且名正而幸早驟也子義曰太守以賢求我我顧以不賢應之乎風者慚而退萬歷初始計偕升禮部已需次得淮安司訓准爲南北之轉士習澆競子義至諄諄導以禮法日聚徒爲之講解經義淮士斌斌化之而准守邵元節亦慕重之不敢以屬禮屈顧以親老累乞歸守固留之尋卒於官年六十有四子義白皙飄髯身長七尺壯歲砥礪廉隅意所稍拂輒義形於色人以其巖峻憚避之比於程叔子因自號方齋晚更綜博羣籍所養益粹然善與世推移絕不作町畦刻畫狀人無賢愚貴賤咸接



之以和而其中介然如故遇飲食之會或狂俠少年欲  
作滛褻語視子義在坐則終席跼踖不敢發以故邑  
中自縉紳士大夫逮賈豎夏畦無不知尊禮之者其温  
靖恬穆又類程伯子至其隱微對妻子無惰容無戲言  
蓋庶幾不愧屋漏云所著有四書通解易經會義讀易  
別記易說春秋大旨詩經疏解家禮纂要徐學謨作  
殷先生傳  
邱集字子成通經協物尤精於三禮其論古今沿革損  
益之故瞭若指掌又熟於濂洛關閩之書學者稱寒谷  
先生學御史楊宜許引官族才者一人有司達集名補  
邑校弟子員見諸弟子多佻健無威儀貪鄙不法又淺  
陋空疏無學術心竊賤之比釋奠尤不欲觀乃條上禮

樂典章數十事或訕爲迂因著論闢之曰楊墨佛老古  
之所爲畔道者不知今畔道不在緇衣黃冠而在縉紳  
逢掖也蓋今之緇衣黃冠稱知理義者卽所擯棄僅能  
持其偏說之說誘惑愚民亦流俗之所輕也其害在廢  
削民財而已縉紳逢掖舉世之所光榮者也乃徒破裂  
經義造飾浮詞以爲立身之本盡於此矣及其行事則  
作奸搆利縱其所如不知有名教之範也稍外自好不  
與流俗同汙者則羣聚詆之以爲浮學如見怪物焉曰  
此聖賢事也彼何人斯敢於矯詐沽名如是乎僉謨造  
謗必仆之而後已足絕修行之路而滅秉之良也其  
率天下不至魍魎魍魎不止爲害寧有極乎故曰今之



畔道不在緇衣黃冠而在緇紳逢掖也學者如是而廟祀孔子爲先師吾知二丁釋奠夫子有靈必吐棄走矣議論剴切如此以故人不親輔而集終不稍降其志性孝友父病於官集疾馳入京侍父父握其手曰吾幾汝來請告而歸願畢矣集受命草疏上之兩閱月得賜歸集憂勞成疾七日不食旣渡江而漸瘥比至家益以躬行實踐爲志當倭亂時與寡姊共埋金於地姊遯集遇倭被脅出已藏與之姊所寓金悉還而歸焉伯兄與兄子先後坐逋賦當戍集奔走營救至被累繫獄不怨積年乃解家益貧或日不重炊冬以故紙囊敗絮爲被而讀書不綴

黃淳耀字蘊生一字松崖號陶菴又號水鏡居士自幼家貧遷徙無定年二十三始家於方泰之菱門涇課徒自給陸翼王張德符高德邁侯記原幾道研德雲俱知含兄弟皆師事之崇禎十五年舉於鄉十六年成進士十七年李士成陷北京莊烈帝自縊於煤山夏五月大清定鼎京師爲順治元年二月夏五月大清兵破南京閏六月王師徇地至嘉定公與其弟淵耀率鄉兵守城七月四日城破公兄弟二人至城西僧舍自經死五年公之父完初自營生墾於鹽鐵塘之原葬公兄弟於昭穆兩位門人私謚貞文乾隆四十一年奉旨議謚忠節明史儒林傳云黃淳耀爲諸生時深疾科舉



人浮靡淫麗乃原本六經一出以典雅名士爭務聲利  
獨澹漠自甘不事徵逐崇禎十六年成進士歸益研經  
籍緼袍糲食蕭然一室京師陷福王立南都諸進士悉  
授官淳耀獨不赴選及南都亡嘉定亦破愾然大息偕  
弟淵耀入僧舍將自盡僧曰公未復官可無死淳耀曰  
城亡與亡豈以出處貳心乃索筆書曰宏光元年七月  
二十四日進士黃淳耀自裁於城西僧舍嗚呼進不能  
宣力王朝退不能潔身自隱讀書寡益學道無成耿耿  
不寐此心而已遂與淵耀相對縊死年四十有一淳耀  
弱冠卽有志聖賢之學爲日歷晝之所爲夜必書之凡  
語言得失念慮純雜無不備識用自省改而充養和粹

造詣益深所作詩古文悉軌先進卓然名家

案年譜忠節公初名

金耀崇禎十七年辛巳忠節年三十七歲應科試改今各弟名金友亦於是時改爲淵耀補博士弟子員

門人侯元泓作行狀曰先生年十七補博士弟子前  
後小試凡冠軍二十四先是馬文忠世奇以文章鳴  
江左及一見先生文則曰此人才識吾不逮也由是  
一時物望若張庶常溥夏考功允彛楊孝廉廷樞莫  
不側席願交先生先生泊然如不屑也隱居授徒淨  
湛諸生二十餘年穿穴經傳綜核性理爲文務醇正  
推明濂洛關閩之旨年垂強仕不售乃與唐聖舉昌  
全夏啟霖蛟陳義扶倣陸翼王元輔弟偉恭淵耀及  
泓兄弟等爲直言社壬午嘗語及門曰利祿之關子



自反已過之親老祚薄勉一再應自此南山之南誓不入棘闈矣榜發竟魁其房藏藁旣出天下翕然推先生爲一科冠癸未中進士第廷試二甲出身未幾南歸與直言社諸子磨礮探索日攷月稽積疑忽開豁然自得人莫測也乙酉五月南都陷嘉定鄉兵起紳士分門而守守十餘日城陷師薄東闔而上時先生守西門從者四人掖先生遜先生正色曰爾輩不識時勢未有城破而城外猶得幸免者也偉恭在旁見從者持先生急大言曰阿兄主意須定攜手入僧舍閉門拒從者排戶入求出不已先生曰吾意素定豈汝輩哀所能驟易乎偉恭曰汝輩不去爲之行齋耶出袖中遺金投之曰速去同死無益從者慟哭而去僧無等與先生兄弟爲方外交問曰君雖進士猶未授職可以無死先生曰出身之士猶許嫁之女夫死殉節亦其所也軍聲益迫偉恭曰此其時矣先生遂索筆書數十言書畢與偉恭同縊焉暴屍七晝夜同殉者蛆蟲穿漏膏血訶潰獨先生鬚眉翛然肉骨不敗里中仗義子弟與無等收而殯之

黃淵耀字偉恭號谷簾淳耀同母弟邑諸生明史儒林傳云好學敦行如其兄淳耀在京時與之書曰臚傳時人見鼎甲先上皆嘖嘖稱羨吾此時歎息無限天地間自有數千年一人數百年一人今人必不肯爲而必欲



爲三年之一人何也淵耀亦以品節自厲順治二年偕  
兄守城城破同兄至城西僧舍對縊死淵耀見兄頭幘  
墮地復下拾而冠之乃引決時年二十二

事載朱九初  
乙酉紀事及

陸翼王  
爭光錄

侯開國曰偉恭先生講道論德及從兄正命年僅弱  
冠以激烈佐其從容以理學成其忠節位置在二程  
二顏之間

淵耀之外舅王貢生雲程字鵬九兵至被執不屈死  
妻及二女繫繩於腰牽連溺水皆死長女卽淵耀之  
配也

陸元輔

陸元輔字翼王號默菴又號菊隱先世本王姓新涇里  
人後居北城父昌期以掾起家署太平府司獄申明冤  
濫調番禺沙灣巡檢初至獲渠盜上官輒以賄縱昌期  
乃以藁縛投海中盜少息番禺祀之名宦元輔爲黃淳  
耀門人直言社中小有指摘必痛悔流涕淳耀稱其學  
行後棄諸生授經諸巨室博覽強記經術湛深益研精  
於理學康熙戊午應舉博學鴻詞以不入格罷館京師  
所主者俱文學侍從之臣每故事有奧僻未易條對者  
輒訪之元輔口答手疏或檢書示之莫不曉暢而去撰  
述甚富子宗濰字維水復姓王太學生工詩文一軌於  
法古貌古心有固窮之操歿年八十

徵君少年以節義  
稱其梗槩見陳迺







秦立曰徵君學於陶菴陶菴每稱其進道之勇師弟最相得師既歿國徵君懸其像於書室晨夕瞻拜終其身不衰及被召迫於當事之勸駕乃行試之前一夕夢其師於掌中書碧血二字示之故其不入格而罷也蓋默有所受云

徵君居北府衙堂名潛經朱彞尊所書

陸元鼎字公麟一字漢年號傳岩又號兩方南翔人遷方秦從陳確菴瑚講學於先儒書潛心研究意有不合輒反覆辨論嘗曰學者當虛衷審理以求合古聖人之道何必存此是彼非之見確菴深然之凡其所得皆見之乃行流而造詣益深雅易衣并食未嘗有戚容同學

友攜其所著示館閣魏公象樞徐公元文宋公德宜俱極嘆賞將彙疏薦舉亟馳書止之志操嚴峻確乎不可拔著有易參四書參尚友編心學編讀史隨筆讀書詩集名四省樓草

陸時隆字道協慕郭林宗之爲人故自號郭亭當天啟時逆璫魏忠賢亂政戮害忠良時隆於時方八九歲束草爲形以射之及崇禎末時時畫沙聚米曰天下未寧苟有用我其可無備乎以文章好奇屢不得志于鎖院無由一建其功未幾科場獄起未幾奏銷法行自是從方外友談靜功終年閉關蕭然高寄然非其所好也或問經濟何先曰經者經世之謂試思何道方可經理一



世濟者濟時之謂要識時弊何從而濟之有三十年而後成者一曰復古校以養人材有數年而後舉者二曰都洛陽以便漕貢墾西北以廣蓄貯畫方田以治畎澮有三年而後奏效者三曰嚴考課以清仕途清鄉里以平賦役有旦夕不可遲者四曰停預征以培國脈表忠節以勵臣工汰胥吏以絕蠹弊撤海禁以通貨財其言似迂濶者然經世濟時實在于此時隆自少至老更歷升■夷險未嘗一日廢書卷者而喪子惟日纂錄以解哀思手抄凡二三尺許非發明理義則農政水利兵法典禮之有繫國體民生者潛居小圃芟草灌畦躬自爲之歲入江灘田四十畝半以購書鶉衣藿食怡然無動于中也生平大槩以有恥爲基以能恕爲用以大公無我爲究竟故無講學之名而有體道之實無民社之責而有不志天下之心晚而造履益篤持守益堅不求人知然自老成有道之人語郭亭者必斂容曰此正人也所著有性理刪正道類函膠邑人物考乙酉紀事發潛錄郭亭樂府郭亭三編

諸士儼陸郭亭傳曰郭亭父諱禹定博洽多能有高行旣歿門人謚曰簡孝先生郭亭幼失怙未力於學母鄒氏設簡孝遺像勵之又陳遺書于几案曰汝父手澤也省念無怠郭亭由是振迅猛進盡通古今之業初試童子科邑令謝司寇倪巡漕吳巡嵯馮皆以



國士目之五試棘圍文多觸忌不售困頓諸生間布  
衣蔬食雖或絕煙不苟營求不干謁長吏乙酉奉母  
歸淞左期年母卒毀瘠自廢田廬將終焉鄉老許潛  
壺闕瞿亭輩重其行交口推譽以應徵辟郭亭堅謝  
之曰吾寒素士也豈足與於此治圃五六畝與室吳  
偕隱其中灌畦種菜而已時或賣文得潤筆卽沽酒  
以酌良朋購書數千卷翻覆披覽著論發明嘗言漢  
人多邊見唐人多枝詞宋人言事有原委言理有根  
據又辨論三教異同極言同處無乎不異其讀書解  
會發所未發多如此嘗習兵家言兼討農政曰我雖  
不出此當今急務其可不講嘗著論痛漕法之大害  
必宜變易欲變東南之漕先墾西北之田欲墾西北  
之田先治西北之水利以運河之水爲漑田之水則  
粟有餘而東南之漕可息此萬世之利也其經世遠  
略多如此又嘗語予曰神廟之末及乎啓禎內外交  
訐國勢日削蓋由治兵者不知寇敵之所由興內寇  
在安民民安則寇自解外敵宜固圉守固則敵不躡  
入而無俟于戰此大勢之當審者也士人之貪日甚  
一日府縣非貪取以奉大吏則府縣不能安其位撫  
按非貪取以餽宰臣則撫按無以行其權銓選有例  
陞陟有例而天下無廉官此根本之宜清者也論今  
時之治道不在禮樂教化而在輕賦稅平徭役今之



解運皆在官其法最善所不善者獨賦法耳論學校  
謂古學本以養人才今學適以壞人才宜盡廢今法  
而推鄉之賢者一人爲師教士就天資所近與志向  
所專天文水利農政兵法典禮律令各治一事師以  
其事歲薦一二八而士卽以其事受官効績且習之  
至壯然後用之以塞倖進之門論官吏謂府縣爲親  
民之官宜假以事權事關民生許其直達而不受制  
于督撫監司府縣有地方之責宜令兵壯屬之守牧  
而不必多設武臣吏胥員數大縣不過三十人以所  
薦士未就官者爲之年一更換士爲之則先習于吏  
事有廉恥而不爲文法之弊數更則弊亦無由而作  
論制產謂宜隨地大小畫爲方形而以步百爲畝千  
畝一大方百畝一小方以其畸零爲官田而還本人  
之直畫方則無所欺隱步百則易于計筭還直則無  
損于民在官則可備爲賑論刑獄謂今之抑枉不在  
不明不在不慎而在徇私而不公襲虛文而展轉委  
馭久滯不結其務息訟而訟日繁者由反坐之律不  
嚴論治國大體以卹忠節舉遺逸爲行政之先圖以  
懲貪污減浮額停豫征爲得民之要務其言如此使  
其見諸施行世何患不治治何患不古而郭亭且老  
矣豈天未欲平治天下哉始癸丑春邑令趙公聘修  
邑志橐具趙公意爲增損同事悞不敢言郭亭上書



諍其失曰志災異意在修省其大饑大祲有書賑濟者非以市德以見災荒之歲不可無賑爲行政者取法焉耳今於康熙十年辛亥六月一條公竊自綴云賑局二十二所用米四千六百四十七石濟饑民男婦九十七萬一千八百七十九口無論米所從來人數虛實果皆有之近乎誇矣無乃非宜城池一條下又自綴云捐俸之外多方設處夫修城之費出於排門書助衆方嘖嘖何爲設處今之縣俸四十五兩又經裁減則所捐幾何名實乖刺甚矣無乃非宜海鹽人豪張元陽寓嘉定與邑人張由交善錢牧齋序張由詩稱元陽以論兵隱東海著有方隅武備一書某問之邑人莫有知者此在後輩殊爲淺陋故因牧齋序言表其姓氏列諸流寓與程嘉燧諸公並傳而公忽刪之隱德朱國光施粟施藥不受直有道諸士儼爲之立傳士儼崑山人也尙思表著之同里何敢有遺而公亦刪之陳門李貞孝全志節且知大禮嚴永思王簡平皆爲作傳黃陶菴又爲題跋此列婦之可爲師範者而公又刪之不知公誠何意或言公以其子孫莫有交際又無人焉爲之請託公豈其然乎此某所專司不敢不言又有非某所纂而不妨并及之者如圩畝一項以圩繫畝以畝繫里邑有定里則里有定畝嘉之爲里六百七十有八則其爲畝也亦六



百七十八無疑矣載之志書征賦編差遂有成額今戶供冊爲畧七百十有奇不知地何在而忽增以其不合志書議論紛然起矣將以志書從徭冊則志書虛將以徭冊質志書則徭冊謬纂修者不得已從舊額如韓志及觀新本竟有移圩者增畧者如此何足以定賦徭學校廩田在韓志以後募義捐助者今志正應開列以彰高誼如撫院徐公按院房公發鈔關銀買田其時知縣胡公益以本縣放存銀其買田一百七十二畝一分四釐二毫以備調卹今載入者僅一百五十八畝九分有奇至于春元周維新助田三十七畝二分三釐竟全爲刪沒如此爲善者其何以

勸謝公三賓名宦也書院廩田之下誣公以私賣李公資坤王公儀皆賢令也里猶占其祠不爲復并其政蹟又削之後之仕者將何所式諸本傳之末謂凡子孫名氏不必附見蓋以家乘私也邑志公也私者可以聯綴子孫公則止於其人其子若孫有行蹟者寧自立傳而不必贅名氏于其祖父之後此說是矣然有可綴而不綴又有不必綴而綴者將何以爲例風俗志不言鄉紳修身善俗者何方而但憂貧諸生雖波靡亦實有中流砥柱者而槩抹之何以維風化此皆公所改易纂修者不如是也又人物志自啓禎以下時代先後失序者多古人論人必論世將何以



爲攷核糧額有火耗皆稱正額輸納之時又加火耗  
其中視舊濫加者不能一一清除何以剔弊是數端  
者各有攸司言之似乎越俎使聞者謂公宇下有直  
言之士於公不亦可光乎書上不報乃修私志如龔  
曾二公例以俟後之考質云

錢大昕字曉徵號辛楣又號竹汀乾隆十六年 召試  
賜內閣中書十九年成進士官至少詹事髫髻時聰  
穎非常與王鳴盛皆有神童之譽自人詞垣覃研經史  
根柢精深詩賦之外究心數理精蘊歷象考成通中西  
之學秦文恭公修五禮通考屬以相助自廣東學政銜  
恤歸家有終焉之志主鍾山紫陽講席者二十年一時

名士盡出其門所撰二十一史考異通鑑注辨正元史  
藝文志三統術衍金石跋尾養新錄諸書傳播海內蓋  
鄭夾深王深寧之流亞也年七十五追溯爲諸生已六  
十年有司循例請重游泮宮有句云三不朽問當立脚  
四先生後孰差肩其實唐婁諸公皆不逮其百一也嘉  
慶九年卒於紫陽書院年七十有七十二年崇祀鄉賢  
楊州阮元曰 國初以來諸儒或言道德或言經術  
或言史學或言天學或言地理或言文字音韻或言  
金石詩文惟嘉定錢辛楣先生能兼其成由今言之  
蓋有九難先生講學 上書房歸里甚早人倫師表  
履蹈粹然此人所難能一也深於道德性情之理持



論執中實事求是此人所難能二也潛碑經學傳疏  
注義無不洞徹原委此人所難能三也正史雜史無  
不討尋訂千年未正之譌此人所難能四也精通天  
算三統術此人所難能五也校正地志古今沿革分  
合考而明之此人所難能六也六書音韻觀其會通  
此人所難能七也金石文字蒐采編錄於官制史事  
攷核尤精此人所難能八也詩古文詞早歲主盟壇  
坵冠冕館閣此人所難能九也

### 文苑傳

明

王葵字常宗其先蜀人父允中爲崑山通川學教授遂著  
籍嘉定洪武三年以布衣召修元史書成賜金幣遣還  
又薦入翰林以母老乞歸築歸養堂本姓陳故自號媯  
媯子長洲高啟作媯媯子歌閒居考求古制冠巾衫裳  
帶履以服或謂之曰今人而不服今之服是得罪有司  
也天子嘗賜之織幣而不製爲服是隱君之賜也答曰  
葵初未入仕布衣也而服斯服將以入麋鹿之羣焉君  
之賜其可褻乎葵蓋以自便也葵嘗游天台從學于孟  
夢恂故其文特醇雅時楊維禎以文雄于東南從游者  
甚衆葵作文妖一篇詆之辭曰天下所謂妖者狐而已  
矣然而文有妖焉殆有過于狐者夫狐也俄而爲女婦  
世之男子不幸而戒焉者莫不謂爲女婦則固見其黛



緣朱白柔曼傾衍之容所以妖者無乎不至故謂之眞  
 女婦也雖然以爲人也則非人以爲女婦也則非女婦  
 由其狡獪幻化爲之此妖之所以妖也文者道之所在  
 曷爲而妖哉浙之東西言文者必曰楊先生子觀其文  
 以淫辭譎語裂仁義反名教濁亂先聖之道顧乃柔曼  
 傾衍黛綠朱白狡獪幻化奄焉以自媚是狐而女婦者  
 也宜乎世之男子之惑之也予故曰會稽楊維禎之文  
 狐也文妖也噫狐之妖止於殺人之身若文之妖往往  
 使後生小子羣趨而競習焉其足以爲斯文禍匪淺小  
 也文而可妖哉然妖固非文也世蓋有男子而弗惑者  
 何憂焉魏觀守蘇州初行鄉飲酒禮請蔡爲碑文觀誅

蔡與高啓俱論死後列祀鄉賢

婁堅傳曰婦陳姓也先生本陳氏裔欲復

姓而未 **■** 雖於物印鼻長尾兩則挂於木以尾室鼻

黃暉曰常宗剛好古被薦修元史書成乞養親歸

吳閉門著述太守魏觀浚河得佳研常宗爲作頌因

坐觀黨死

高啟春日懷十友詩注十友謂余堯臣張羽楊基王行呂敏宋堯徐賁陳則僧道衍

也 王蔡

顧文煜字光遠嘗學詩於蜀楊載清新婉麗得其家法  
 元季以才辟鎮江掾明太祖下江南命監大軍倉從征  
 陳友諒以督運功授龍陽州牧招附懷來民以休息改  
 知秦和以受重祖母喪解任留翰林議編大明律尋授  
 廣東行省右司郎中洪武二年召拜吳王副相未行以



他事註誤逮問得疾卒文煜吏粵均輸納安通逃修城  
隍練士焉粵人德之祀名宦晚自號蔗境翁

金文徵字德儒號鶉居子居邑城工古文詞洪武初辟  
爲本縣學訓導庚戌鄉薦第二敕免會試授鄜州同知  
有循良譽時同邑黃琮常熟張著皆爲屬縣每共賡吟

爲長安唱和集自著有龍門山人集遷國子學錄從兄

珉字德進元季訓導長洲洪武初爲國子助教歿後列

祀鄉賢吳中人物志崑山余燠官吏部尙書誤聽鄉人  
學錄金文徵語移文令祭酒宋訥致仕因與文

徵同  
賜死

張宸字翰宸居南翔有才名工書居隣佛寺嘗盡取藏

經書之得晉人神妙洪武初辟署本縣學訓導入中書

以撰慶賀表忤旨被逮死都市弟粹中字翰英國子生

尤工草書

王庚字景星由紹興遷居嘉定少受業於其鄉楊維楨

通春秋學洪武十二年辟爲縣學訓導

鄭閔字以純少受易於元進士崇德鮑恂鮑恂字伯孚  
崇德人舊志

作嘉  
禾非學旣成崑山長洲更聘爲訓導郡縣治易者多出

其門洪武間薦授主客郎中移疾歸自號味易叟所著

有味易餘吟江漢吟祀鄉賢祠

袁銘字德新居邑城從長洲申屠衡受春秋學洪武間

以經明行修舉召對稱旨授蘇州府訓導治經者宗之

永樂乙酉同考應天鄉試識拔皆才雋將遷官卒於學



署

陳孜字克和通敏多識洪武間以薦舉試政行在兵部尚書張本稱為倚馬萬言才補職方主事軍國機宜多所咨決時戎務滋弊為民害孜撰軍政條例上之詔著為令終工部郎中

鄭濟川居依仁鄉洪武三十年以懷才抱德薦和御製思得賢人詩稱旨擢廣東道監察御史改北平布政司都事永樂初引見賜冠帶致仕七年起署滁州事九年赴京仍致仕歸

宣嗣宗字彥初

明書畫史嗣宗號凝素

永樂中任中書舍人專書

內制時楊文貞士奇在內閣凡誥敕字句有未愜者嗣

宗停筆楊輒更定多所裨益扈從北征以淳謹受主知

後丁內艱特詔起復預修成祖實錄歷官驗封郎中卒

於京邸敕有司護其喪歸諭祭于家贈戶部左侍郎

楊志

作吏

馬魯字希賢以明經薦授新寧伯教讀改訓導精於考

訂書畫秦輔之重修練川志惜兵燬不傳

周璣字仲璣讀書多識隱居教授喜為詩嘗修邑志

范騰字搏霄好學多聞建安楊榮見所著述深器之宣

德間與陳述同舉賢良當事者難之曰一邑二賢將不

勝舉矣或勸騰以賂進正色曰出處有命豈可以賄辱

名器耶遂束裝南歸終身不仕子紳字朝儀行誼高潔



不就辟舉工古文辭善行草八分小篆爲時所重

潘暄字時陽居北城詩文濡毫立就登正統乙丑進士官刑部郎中性疎簡伉直嘗爲同官所誣謫戍上谷宥歸放於詩酒或勸治生日二疏何如人耶自號半散叟喜汲引後學才俊多出其門所居有頤節堂自爲記二子京密皆舉於鄉京子臨貢試南宮大廷皆第一章黼字道常別號守道隱居授徙博洽多識年三十病足遂絕意進取考訂六書訛謬潛心三十年編韻學集成等書卒年八十僉事吳珮御史劉魁知縣吳哲爲先後梓行之

徐博字德宏居西郊與弟忭同舉於鄉博登成化丙戌進士知湘鄉縣天順間擢監察御史巡視兩淮及期代者且至以歸省爲言官所劾左遷樂陵知縣改知巴東得心疾乞歸爲人豪邁善草書詩與松江張弼相伯仲宣昶字汝昭居東城授經里中邑之治詩者多出其門龔尙書宏其高弟也領成化戊子鄉薦選惠州府同知丁外艱服闋都御史王恕嘗見昶文謂必端士薦補西安府同知以廉惠稱時御史李興屬推官袁經按貴人獄反爲所構事連御史昶乃代二人引咎於中慨然曰悞二君者昶也卽日投劾歸旣而告人曰吾豈爲袁李棄官哉誠不欲令御史爲人所撓使法不得行耳袁後爲御史按吳昶言不及私袁嘆曰吾至蘇不撻一人



此所以報公也卒年九十四

金濂字懋光江陵教諭洪之弟歲貢生為人樸忠人有

過輒正言折之長於史學嘗輯諸史會編又作歷年甲

子圖宏治中仕為象山訓導兄子楷府志誤以濂為太倉人

楷字式之洪之子天資穎特嘗與郡人王鏊讀書古寺

偶拈法華經循覽一周各能成誦為文亦相頡頏督學

御史戴珊歷校諸生獨指楷文謂可與鏊相伯仲成化

乙未會試鏊第一楷第二選次當為京朝官以負才中

時忌出知涪州久之免官歸楷博學強記所著述甚富

家再被火無復存者

某字東白居三都少孤貧嗜學聞有異書必購求鈔

讀故其學多所該識邑有修纂輒杲為之人品高潔邑

令王術方之林和靖為治生壙年九十而終所著鷄臆

筆錄練川志日歷紀聞及詩文若干卷後燼於火無傳

焉

翟校字啟英居邑城祥四世孫父深有孝行嘗負母出

烈焰中校高覽博識嘗輯練音由歲貢仕浙江平陽訓

導卒於官龔志載成周悼啓英一律以啓英履歷附題下不另立傳

沈湘字明善號一默家貧少孤讀書博綜羣籍經史賅

通詩學書法並窺堂奧隱居教授名徹遐邇正德初以

布衣徵修孝宗實錄舉鄉飲賓沈氏家傳

廿元雋字舜登居南翔正德丙子舉人著定陶教諭遷



知陵縣有清操失上官意罷歸四壁蕭然手未嘗釋卷  
晚以詩名及歿有司爲之營葬

邱峻字惟陟居菱門涇嘉靖八年進士歷官大理寺右  
寺評事寺副寺正折獄號無冤民每讀獄詞必反覆紬  
繹同舍郎欲下署輒扼其臂曰君輩勿輕作允字允字  
上當流血也有大闕出鎮廣東多不法坐大辟已而遍  
賄當事得末減矣乃因鄉人自通願密以萬金爲壽峻  
大詈曰五嶺之人思食其肉峻爲法官而縱之子竟駁  
讞詞後錄囚浙江請罷校尉隨行民以不擾守難進易  
退之學名振四方學者稱菱川先生

浦南金字伯兼居婁塘嘉靖壬午舉人學問該博詩文

負一時重望由歸安教諭擢國子助教當超遷旅見大  
司成行步詳緩司成以爲嫌復以事忤遷曹出爲唐邱  
教授時有同年在政府或勸之求援南金但笑領之歲  
餘移疾歸知縣楊旦聘修邑志又著修詞指南詩學正  
宗二書以鏤版罄其產歿無餘貲故交賻之始克葬  
李重字威甫居廣福本農家而不辨五穀獨嗜學強記  
人以奇詞粵義相質爲言見何書在某卷歷歷無譌嘉  
靖甲午鄉試由長興教諭遷深澤知縣日與諸生討論  
經史吏治非所長而廉潔自持民有善黃白之術者一  
豪公子求其方不與遂陷以大盜重廉得其情釋之後  
解任其人追送五十里外并獻其方重曰汝以此幾及



禍奈何以禍我子孫焚之馬前而去

趙中行字子與居一都貌樸行淳以經濟自負嘉靖癸卯舉於鄉兩上公車不第有故人薦於嚴嵩令一晉謁卽得美官中行不應促裝南還家居鶉衣藿食不廢吟咏遇倭警籌畫守禦之法甚備丙辰大祲條上賑恤事宜於部使者悉見施行民多賴之有定川遺稿子承易字繼川孫世熙字以寧俱諸生以文行稱

李士龍字應明居江灣平生修謹與物無忤嘉靖間由歲貢秉鐸餘姚嘉興陞建寧教授告歸以書畫咏歌自適所著有雲塘集萍隱錄

錢春沂字仲與居四都學者稱一菴先生爲諸生時父被冤繫慷慨陳情竟出死獄沂後舉嘉靖甲子鄉試由繁昌教諭遷德化令吏以羨餘進沂曰此百姓膏血也去不受未幾求歸上官弗許遂書林下清風四字置諸馬首而去優游詩酒者二十年乃卒人比之陶彭澤云春沂嘗與殷都放飲連日不醉又嘗兩人坐篋輿中互稱其體重輕取巨甕貯酒二石飲之飲旣盡再就篋輿稱之重輕乃與初時等因轟笑曰此腹直五斗米囊大耳不知巨甕中物貯何處也其爲任達如此

東塘

日劄

朱用賓字獻夫居四都有異才弱冠名重一時常授徒不肖子苦其嚴置毒食中遂瞖一夕夢見日光覺而兩



目炯如乃復應舉登嘉靖壬子鄉試一試南宮不第目疾又作日與子弟討論經傳爲人愷悌直諒好獎掖後進

徐應解字原易博覽強記於書無所不窺而獨不屑意於章句以故爲諸生雅負駿譽者垂三十年竟誦於一第晚貢禮部爲大名校官嘉靖中以特恩超拜鄆城令會不悅於郡使者解印綬歸

秦鑄字遷良號楓亭官吏部主事遷刑部郎中志尙高曠甫杖鄉卽移疾歸隆萬間嚶邑名流挺出超軼晚近鑄造就之力爲多

徐嘉言字汝默萬歷選貢官福建永福知縣調永順宣慰都事以忤守意罷爲文根本六經而汪洋自恣性好遊嘗度揚子過洞庭浮沅湘與蠻獠雜居蠻獠之長請爲弟子師居五年藝俗大化平居不修儀度顛瘁落實似山澤之臞而神趣曠遠邈然無際

沈紹伊字伯咸御史陽之長子萬歷二十五年貢江西崇義縣學訓導平生遜志於學肆力於文尙書潘季馴一見嘆賞會遭所忌賫志以沒所著有沈博士集

陳炎字上■居婁塘父瞽以星卜所入資其膏火炎讀書必至夜分學極該博詩文俱自成家爲人樸厚於物無齟齬而介節自不可易領萬歷癸酉鄉薦未仕卒傳遜字元凱居八都萬歷三年貢由嚶縣訓導歷建昌



教諭周藩長史身長八尺儀觀偉然少好讀書至老不  
倦其學長於論古今成敗師事崑山歸有光文辭不及  
而持論常屈其師倭寇圍崑山請縋城出詣軍府告急  
竟得解圍尤好左氏春秋參互考訂以正杜氏之訛有  
春秋左傳屬事本末行世

陳可言字以忠以春秋名家好左氏傳嘗倣建安袁氏  
通鑑紀事本末作春秋經傳類事九十餘條爲三十六  
卷其釋義主杜氏而多所損益歷二十年始成後竟窮  
困以沒

張應武字茂仁號三江情仲子年未壯卽棄去諸生師  
事歸有光得史學之傳平生以經濟自負所著述皆切  
時務可見諸施行晚年由安亭卜居南城同邱集婁堅  
唐時升輩講學論古知縣韓浚修邑志發凡起例皆出  
其手詩清矯不羣有文起齋稿子定安字仲慧負才早  
卒王世貞爲作傳

金兆登字子魚居東城父大有字伯謙嘉靖戊午舉人  
素稱長者嘗被里兒誣訟已而其子以盜事覺語連父  
并坐死大有知其冤因爲令言盜獨其子遂得釋兆登  
少敏悟工詩文舉萬歷壬午鄉試十上公車不第以耆  
德授都察院都事沒於仕進奉母郊居庚子歲計偕北  
上夜宿旅店亡其橐有司按治主家勒盡償兆登陰縱  
之曰吾不忍戕數口以完吾橐也長厚率類其父子德



開德行並以詩文名

兆登嘗舟過黃河大雪遇一人僵仆河干令候其氣未絕昇諸舟裏以重衾初哽咽不能語旣乃知浙人計偕者兆登衣食之同載入都是科仍下第而浙生獲售仕至冢宰數詒書招兆登仕以母老辭乃遙授

都事亦不赴

臨雲堂  
襟錄

徐允祿字女廉瑄五世孫年十五就童子試郡守賞其文謂與奇童李名芳沈紹侃並驅三人皆嘉定人也補郡弟子員文一篇出遠近爭傳誦之平生邃於經學著易說毛詩說尙書解禮樂解春秋愚謂蘇偃十七書史論自周威烈王起至元順帝止嘗試京兆被黜時在朝名公卿皆願下交王文肅公父子更深推獎謂目前無此人而允祿自安時命終無一言借其推挽老困諸生家甚貧妻子噉糠覈敝衣苴履泊然自守口期艾談及古今節義及軍國大事則辨論蠡涌朝士皆以爲不及也所善友曰張表朱稚美劉維藩皆獨行之士表字君日爲文溫淳典雅而志節嶢然或冬月不能著絮家唯一婢所親負豪家錢卽鬻以代償維藩字价伯好古執禮丹鉛不倦兼通歷律堪輿陰陽術數別纂歷代事成書幾至千卷子稚美自有傳

唐時升字叔達居西城少孤有異才年未三十謝去舉子業讀書汲古志大而論高嘗以李文饒自期王錫爵



執政時升偕其子衡讀書邸中縱論天下事凡兵農錢穀具言始終沿革東西構兵萬里外羽書旁午獨逆料情形無不奇中衡問何以知之時升曰吾觀古人事固有類此者竊意之耳詩才雄健古文師承歸有光著有三易堂集知縣謝三賓序而刻之崇禎二年舉鄉飲賓歿祀鄉賢

婁堅字子柔由江東徙居南城經明行修學者推爲大師年五十貢於春官不仕而歸其師友皆出震川之門傳道講學以相切劘學者師承詩律在元和慶歷之間箴砭俗學抉摘踏駁從容更僕具有條理書法妙天下

須之彥字君美由廣福遷東城父諫字惟厚居鄉多長者之行之彥登萬歷戊戌進士工文詞有幹濟畧歷淳安浦江桐鄉令遷武學教授國子博士擢都水主事權荆州改儀制司陞員外署郎中爲皇太子未嘗出講生皇長孫十六年不得冊立之彥視草請出講者四請冊立者亦四語至切直神宗崩辦哭臨勸進諸大禮公卿皆以爲能孫侍郎游龍出皇太子令旨袖中以先帝遺命尊貴如爲皇后之彥毅然持不可立索筆草疏極論之太子悟事得寢又參題南戶部援例假印事言國家財用匱不得已爲此苟且事例不意遂爲吏胥穴窟白丁入京未幾月儼然得一官矣因定戶禮二部對簿



之法除前弊至條議宗藩則以爲今天下宗祿日民窮日甚故宗困可虞民困尤可 條上四議俱鑿鑿可行者泰昌登極改光祿寺丞繼晉尙寶司少卿魏忠賢擅政以門戶失官崇禎改元詔還冠帶尋卒所著有荆關權政儀曹疏草凝香閣詩集

張錫眉曰嘗過桐鄉歲大饑見其民家相率書一銜位焚香而哭吏感動稍爲之所視其銜位乃之彥也時去任已三十餘年矣

周道隆字從隆居西城家用中字子行以明經司訓青陽遷浙江太平教習淮安教授道隆少力學中萬歷癸卯舉人司教銅陵

道隆苦心安輯莫不柔服值歲饑賑廩千斛滿六載行取入都民謠皆泣送授大理評事累遷刑部郎中獄多平反卒於官

李流芳字長蘅自號慎娛居士先芳從弟舉萬歷丙午鄉試再上春官不第天啓壬戌璫熖方張公車抵近郊賦詩而返遂絕意進取其爲人孝友誠信外通而中介與人交周旋患難傾身救援無所避家貧資修脯以養母稍羸則以分窮交寒士性好佳山水中歲於西湖尤數其書法規撫東坡畫出入元人尤近吳仲圭詩則信筆抒寫持擇在香山斜川間家有檀園樹石皆手自位置卽以各其集伯兒元芳字茂初邑諸生工七言長句



爲錢榮木激賞有夢菴集仲兄名芳字茂才十餘歲已能馳騁文詞試宜興令聞其異才召面試之頃刻數千言宏麗無比更命賦七言詩以爲王子安李長吉之流年二十八登萬歷壬辰進士選授庶吉士明年卒有李翰林集

唐景亮字明仲號東瀛萬歷癸卯舉人任太和教諭陞南京國子學錄歷大理寺都察院司務陞南京車駕司員外郎督馬政宿弊頓釐都棍私鑄事發株連甚衆奏檄訊以三人當辟餘悉省釋遷職方郎中邊事告急群議簡卒登陴景亮謂五方雜處之地家無宿糧勿張皇致擾宜鎮之以靜大司馬深然之而邊事亦漸平出知

延平府在任八月移疾歸未幾卒著有玉蘭堂集別有

職方紀畧劔津政錄

趙志云解組之後同弟景南構玉蘭堂蒔花讀書詩酒唱和考景亮

解組時景南已歿二載矣玉蘭堂係其父所構景亮少時讀書其中非景亮歸而始構景亮歸已老病日惟坐臥一小樓安得復有詩酒倡和之事

鄭允驥字閑孟居西城博聞強記文思敏瞻然視舉子業輒感額不欲爲以此坎壈於時詩長於五言古兀鼻頓挫所交皆知名士尤與李流芳善時以李鄭並稱爲諸生不得志縱酒自放而歿曾刻冷善齋集行世其詩文全集曰芥浮閣

閑孟邑諸生工詩文好飲酒每飲輒酪酏無所知試於有司扶殘醉以往略嘔委頓已而舐筆伸紙據几



疾書文彩爛然不自知宿醒之去體也久之得酒病不能復沾唇注視杯斝嗚咽而已

允駮字彥逸閑孟弟受業於兄得其指授兄弟文名並重一時有冬餘咏懷詩一卷做少陵八哀體俯仰前哲爲其所師友者二十三人邑中道德文章之彥一覽可得

周之謨字公顯由十一都遷西城通經學登萬曆癸丑進士授開州知州開民苦俵馬每一匹價十兩官扣其四軍衛復多橫索之謨因躬自給價而所進馬毛齒尺寸罔不如令無匹馬發換者開民深德之民俗禱雨千百或羣謂之鞭旱魃至有斃孕婦碎屍孩者又多同姓爲婚皆力禁之陋俗盡革考最擢職方員外郎時疆事不靖而兵曹員缺凡籌邊視草轉餉調兵悉出之謨區畫又留心桑梓議蠲官布已得旨俞允會兵興部未申請方擬補贖而遽以病卒時論惜之

汪明際字無際號電菴居東城少孤力學事母以孝聞撫弟妹友愛年弱冠名籍甚尤精易學旁通詩畫萬曆戊午舉於鄉屢困公車謁選得壽昌教諭讀書魏萬山房倡導古學僻邑風移由國子學錄歷都察院司務陞工部主事晉員外郎後以同官誤工拜杖以死所著有遊仙閣集陶齋佚稿義經翼性理會通等書

顧其罔字在一又字尊生原籍嘉定由吳縣籍中天啓



壬戌進士授永豐知縣移劇吉水靖荏苒蠲耗羨值歲  
稔曲措糧賦民不知累建奎閣葺方橋爲兩縣士民之  
利檄拜御史巡視陝西茶馬解京馬匹獨逾故額票茶  
販市剔弊無遺陝西地寒供億例用貂帳其國驚而撤  
去以不附權黨左遷行人司司副轉司正官居臺憲貌  
類書主自視欲然人稱篤行君子祀嘉定鄉賢

李模字子木婁塘人由吳縣籍中天啓乙丑進士令廣  
東東莞舉卓異擢雲南道御史力陳國計民情如立政  
貴圖久大以及慎獄祥刑旱災水利俵馬驛累派徵包  
課等疏凡十餘人巡視三關多所興建旋以糾鎮監爲  
橫爲當所墜謫南雍典籍甲申起補御史抗疏言諸臣  
能認罪方能建功上不以得位爲利諸臣何敢以定策  
爲名一概勲爵並應辭免卒爲權奸所忌以病歸當事  
式廬希得一見年八十一卒

沈宏之名宏功字茂之善記誦喜搜討習舉子業恥  
作經生口吻日課之外博涉百家古文詞族弟宏正好  
古任俠招致于家與相賡和出與公路交遊名雋入則  
研窮經史然家貧年垂壯始有室僦居上海陋室一廛  
不庇風日突煙時斷也久之名日播萬歷癸丑應周延  
儒聘入都交臂公卿間學識更進矢口經濟以爲非緯  
武不足以經文上窮天文下察地理中驗人事採撫進  
退攻取死生奇變之說區分類聚爲城守全書值遼事



起邊關多故其書大行天啓乙丑表崇煥以火攻奏捷  
超擢督師而茂之書有西洋火炮爲第一著語乃訪致  
幕中與語大悅厚幣遺之適有遼參之市茂之爲載之  
南易吳醪以往間關齎送者數次時丁卯戊午間也自  
初入京至表幕中凡十有六年宜興入相仍留茂之於  
邸寓崇禎辛未冬涿州馮相銓聘茂之修輯武事全書  
凡八年書成進御庚辰崇明族弟廷揚入中書求自異  
於衆茂之爲代疏陳海運之策合上意往來海道者四  
年特授廷揚光祿少卿皆其贊助之力也旣懼國變避  
兵崇明乙酉巡撫土國寶知其名邀入署丙戌辭歸卒  
年八十有二茂之生平好學善推物理喜議論自釋老

圖錄陰符讖緯九邊輿圖醫方卜筮以及禽蟲草木農  
圃星歷導引之書靡不窺究且過目不忘一叩其說卽  
信口而談鹽鹽不竭聚米畫沙如在目前閒居手不釋  
卷筆不停書著有青溪草堂詩集城守全書海運書至  
代馮所編武事全書人無見者練川野錄曰宏之在邊  
幕累得千金隨手散去  
無子子  
身以沒

馮淮字會東一字雪竹初居安亭往來吳淞江上禪寺  
獨坐古桂下吟不輟嘗以朱橘詩見賞於陸文裕公公  
子楫贈以龍江別業父子力耕其間後日本入寇乃走  
入城潘錄事爲分宅居之士大夫爭相迎款有江臯集  
子逸遂歸有光  
墓志



遷字子喬淮長子詩名藉甚有長

齋集

松江府志載入流寓明詩

綜誤以為上海人

邃字子潛淮次子工詩及書法嘗遍游天台武夷匡廬諸勝有南游稿雲水道人集

王道通字晉卿居羅店邑諸生自號簡平子負經濟才雅不欲以文章名而文極古茂師沈賓喪喪麻三年入其室終身不敢正坐居親喪邑令謝三賓往訪之道通辭固請乃不易服接見

嚴衍曰簡平有四篤十反事親篤於愛事師篤於敬交友篤於義臨財篤於廉此四篤也好讀書而不惜卷秩好山水而怯於登臨好飲酒而不喜羣酬敬者

老而憎祝壽恤死亡而厭弔喪睦于隣里而不通世俗亦愛功名而甘守貧賤崇奉官長而恥言干謁上論千古好稱管樂之事功荆聶之節俠稽阮之曠達而言行信果又近于硜硜之小人守禮飭躬窒慾遠色可使寒女坐懷而填詞度曲寫怨言哀則綽約婉麗絕有情癡此十反也

嚴衍字永思別號拙道人邑諸生曾著四書說易說總名谿亭問答中歲專精史學以司馬氏通鑑中多疏漏作通鑑補五百卷閱三十年始成詩文渾灑有蘇氏風書法褚米作擘窠大字更奇偉為人孝友篤誠鄉里尊為大師門人談允厚字厚君邑庠生積學工文衍以妹



妻之補輯通鑑多得允厚力

陸元輔曰有族兄弟憤爭構釁衍遺書勸解懇懇數千言兄弟感之相持泣下歡好如初因裝潢其書以永視子孫或聞而借觀讀未終篇歔歔流涕至今相傳以爲美談

衍幼孤母病籲天願減算以代有同祖弟四歲喪父爲卵翼之四十年不知征徭之累又再從弟爲仇家所中繫獄罪當辟衍爲力辨其誣事得白時同白者四人各持金爲壽衍笑謝却之一友貸衍銀比償皆贖者也衍投諸淵戒其子勿洩與謝令三賓善或僞作衍啟以自薦謝遣吏詢遂作真啟薦之其長厚多

此類蘇川野錄

馬元調字巽甫上海諸生徙居南城五歲時聞張應武邱集論說輒竚聽不移足已受學於婁堅堅曰吾門得一馬季通矣長而不遇一意著述每閱一書購古本三四叅究異同辨別改正經術淵源古今典章名物隨所咨問次第條答聽者無不快足點閱諸書皆得關鍵新安程方平以百金籤軸易其通鑑點本猶謂欲然不足償也往來嘉上間兩邑志書皆其手筆考核精詳惜未登文梓而徵文考獻之家必折衷焉邑侯謝三賓一見心折邑有大典故必造室請檢尊經閣藏書復祭器正兩廡先賢位城守議兵築海圩疏濬境內河道小大緩



急皆元調口籌而指畫學者稱簡堂先生甲申之夏黃  
淳耀致書元調云翁丈著書論古以遣牢愁此今日避  
秦之一法生嘗謂前宋遺民皆在越中故國初諸儒承  
傳其學今翁獨抱遺經于殘山剩水間使後世讀書種  
子不絕固莫大之功也乙酉七月四日爲李成棟兵所  
害

侯鼎暘字文侯號赤崖堯峰孫天啓時諸生乙酉峒曾  
父子死難莫敢收斂鼎暘冒死殯之昇歸龍江旋以澣  
亡命蹇連逮繫久乃得免有天浮子集

侯良暘字兼山弱冠隸名邑庠尋以事辭去隱諸翟巷  
工楷書行草年至八十餘揮灑立就腕力不異少壯能  
爲古今詩有石菴遺稿

徐時勉字克勤號蘧菴恂五世孫居南翔崇禎庚辰歲  
貢特恩授山西澄城知縣時流寇猖獗西陲殘破又饑  
饉薦臻民不聊生前令以催科激變被殺澄城不可爲  
矣時勉至見軍需日煩嘆曰民力竭矣吾安能賸百姓  
以全一官乎作文告神立功過簿以自儆治事二年日  
以死自誓除一縣猾反爲所中被劾奪官歸囊無長物  
惟供應簿一束曰留此以示後人使守吾清白而已邑  
紳孫弼明贈以麥六斗云此非交邑侯禮知他物必不  
受且清吏署中恐麥亦不可多得也歸而僦屋以居遂  
古學精毛氏詩學者宗之著有蘧菴集



趙洪範字元錫號芝亭居南城幼時家極貧勤學不少  
輟登天啓壬戌進士初令麻城入爲御史巡按雲南未  
期年土酋普名聲叛攻彌勒州道將無備棄城宵遁撫  
臣王伉爲樞部所劾有旨逮問并及洪範下詔獄尋釋  
歸入國朝不仕以隱逸終所著有周易要義西臺疏  
稿

### 國朝

何平字匡山崇禎庚辰進士任高密知縣陞禮部儀制  
司主事入國朝歷官福建參議解任後攜家歸故里  
構亭曰學圃躬自藝蔬號竹罌老人有學圃亭詩行世  
許自俊字子位號潛壺吳淞軍籍父大達多隱德自俊  
徙居邑之北城九歲能詩文康熙庚戌成進士闈中得  
其文以爲年少高才及拆卷乃前明崇禎癸酉舉人會  
試三中副榜至是三十八年年已七十又九年舉博學  
鴻詞報罷授聞喜縣令以治行祀名宦分校辛酉鄉試  
尋乞歸又三年卒年八十四自俊記誦該洽詩文雄麗  
一時傾動事父孝構遲日草堂爲父招老友時尋壺觴  
花蘂之樂里有老萊之目妹氏早孀有遺腹一女撫若  
親生郡志入  
孝友傳

殷陞字陟明號耿菴職方都次孫年十六補太倉庠生  
以書法名有耿菴詩稿

侯開國曰耿菴爲婁東曹中憲館甥與張西銘吳梅



卷十五  
村爲文字交所居一室顏曰香繭四壁名畫法帖晨  
夕披閱其中王煙客目之爲安樂窩後乃棄青衫放  
跡吳越山水間梅村贈詩云蕉園桐笠御風竹夢裏  
相逢話赤城君是前身殷七七今生贏得是詩名  
周人玉字音生家有藿園諸名士賦詩飲酒於中又與  
蘇泚結社石佛菴著有藿園吟草

李更原名奕字君烏號剩齋明季諸生綺歲卽能詩追  
隨唐三易輩名曰噪晚同許自俊等爲九老社

柯炯字以傳號集菴居槎溪崇禎諸生深於經學間讀  
釋老書亦能探其奧窔著有四書毛詩孝經釋畧暇日

詩編

陸勁節字柔立新涇諸生少與菊隱齊名人號二陸勁  
節奧博又稱兩腳書厨後入東岡社著有戰國策考異  
朱廷選字掄生順治歲貢陸隴其令嘉舉鄉飲大賓卒  
門人私謚靖文有邵廬詩草

李宜之字緇仲名芳之子每有著述引古證今連篇累  
牘文或一篇至數萬言詩一題至百首傾河倒峽人莫  
測其涯涘而放曠不羈亦時時寄興飲博流連青樓紅  
粉間有毀之者宜之乃集二十一史帝王卿相豪傑才  
偉之士好酒及色擄蒲游俠者累數萬餘條多至四巨  
帙其博學強記皆類此世居南翔家有猗園亂後寓侯  
氏東園因以寓園名其集



吳康侯字得全又字定遠號鐵菴居西城明崇禎己卯  
登鄉薦膂力絕人喜讀書自少至耄手不釋卷康熙元  
年謁選知武康縣始至卻舊例香斗銀五百兩服官清  
正以質樸化民武康故多山賊爲民害康侯輒親往擒  
治遂屏息在任三載以本籍奏銷罷歸康侯負大力容  
貌魁偉徒步行三百里不倦日彎強弓測量遠近不爽  
銖兩中夜秉燭作詩賦賦成起擊劍誦兵書緣數赴公  
車不第嘗短衣匹馬往來燕趙間與俠士劍客相追逐  
固名將才也性又酷好典籍罷官後閉戶攻苦不異諸  
生時前齋三楹積書萬卷圍列如城終日蓬垢客至幾  
不能容來平登耄耄手不釋卷著述益勤善繪龍虎松  
石雄勁蒼古勃勃有生氣嘗自言天都觀松石武康捕  
虎後不特精畫理兼悟爲文之道著有小山集鐵菴詩  
文集黃松崖序之付梓未半而歿

侯開國曰武康民患虎公率獵人捕之用巨絙作罟  
網旋諸木末圍之三匝廣數丈獵者蹲踞四隅持鎗  
礮諸器攢向之虎躍而左則左者以礮逆擊之復躍  
而右而前而後亦然蓋凡數四及于斃當虎咆哮跳  
躍時林谷爲之震動從者咸懾息而公屹坐凝然手  
持鐵槩重數十觔所擊虎輒斃嘗率數人夜行山麓  
中有巨石在草衆疑其爲虎也公舉槩奮擊石鏗然  
中裂踰年虎暴亦息



張鴻磐字子石任從孫居南翔蚤慧書法蒼勁詩古文詞皆有指授遨遊浙閩間所交皆當世宗工崇禎季年司農告匱部議復邑漕五萬石佐軍需人心皇皇鴻磐率里老星馳至都草疏入奏得永折如故邑民至今賴之司寇徐石麟器其才交相薦辟力辭不就鼎革後浮湛詩酒聲伎間以布衣自稱壽八十餘舉鄉飲大賓一時稱爲槎溪人瑞云

闕選字若韓原籍崑山授經來嘉定補邑諸生遂家西城中順治戊戌進士坦懷質行與人交洞見肺腑文有根柢長洲汪琬極稱之年七十四卒

選性極孝其告母文一篇讀之未有不流涕者

侯開國初名榮字大年號鳳阿岐曾孫涵子少負軼才受業陸元輔經史子集累朝典故目營手鈔幾忘寢食入太學讀書不求仕進其文冲和峻潔詩雄深樸老著有經世導源錄野乘彙編鳳阿山房集吳膠詩文鈔等書事繼母莫氏孝撫異母弟有恩子銓永皆諸生工詩文能世其家

侯槃字武功一字敬明岐曾之孫七齡遇鼎革槃隨師陸元輔避難於太倉張庶常溥家卽爲婦翁讀書七錄齋天分過人筆如泉湧年十四卽與敦槃名藉甚十七歲天有侯伯子詩文集

王者圭原名雲駟字景元居高涇松江府學生于史



學人皆比之李燾胡三省同邑吳莊有花隱先生傳卽昔圭也舉鄉飲賓子璣原名琦字志韓邑諸生家有非園著非園集鏤板行世

沈履夏字禹甸邑人崇禎諸生後遷虎邱自號白隄迂叟操選政盛交遊才華意氣籠罩一時溧陽陳相國百史送禹甸秋賦詩有六朝賦業應推沈百里星光可照陳之句

張懿實字德符居虬江讀書所曰方瓢卽以自號受學於陶菴補諸生與直言社與上谷六子爲中表昆仲鼎革後偕侯掌亭陸菊隱金獻士諸人重立啓社所著曰

方瓢小箋

相園侯訪

朱子素字九初號湛菴居東城爲諸生需次應貢鼎易謝不起事母以孝聞隱居授徒承故老凋殘之後慨然以斯文爲已任著吳粵文獻歷代遺民錄東塘日劄乙酉紀事哀貞紀畧晚有封禺銀陽二編所居爲懷石山房先是王翹儻居此繼而子素大父清甫居之名高士宅子素仍焉各益稱三子晨昂昂晨字駿思守父遺書次第補輯昂自有傳

子素母故卞急一日怒其婦終夕不敢入婦房在母旁席地而睡俟母解顏乃始釋然

練川野錄

蘇淵字肩聲號或齋居涓浦後遷城南幼善屬文人未有知者爲侯喇曾所賞名迺起明崇禎壬午舉於鄉



國朝順治九年會試副榜爲陽山教諭康熙癸卯纂修  
邑志所居曰濤閣庭有古松一株畜雙鶴于下客至閒  
庭闐寂但聞讀書聲與松風鶴唳相答和而已兄淳弟  
融皆諸生

蘇融字眉涵號惕菴淵從弟從許潛壺遊年十七補諸  
生時有二蘇之日晚歲築廬湄浦顏曰瑟園以觴詠自  
娛著有惕菴稿又嘗輯續練音

張昉字朗初號耐菴名由孫所著名異言擬存

邵琪字隆吉又字玉其諸生性行端慤淹通經傳

吳屯侯字符奇居吳家行少習翰鈐雋武闈分守水汛  
已復棄去補邑諸生食餼於庠旋以責逋落籍詩歌博

雅工鍊從弟廩生莊字茂含能爲古文詞隱於醫

汪价字介人號三儂又號笑愚崇禎間庠生幼慧九歲  
學歌詩十一歲爲古文詞長益博洽遊幕半天下河南  
巡撫賈公漢復修通志聘爲總裁又與修邑乘者再至  
如修李獻吉之墓抒彭燕之難今人中不多得也

程志不爲  
立傳僅附其名  
于邵琪傳後

汪穉實字良稔介長子順治甲午副榜以部費事黜革  
被逮下獄瘦死獄中

穉實與陳碩同榜趙程二志科貢  
表及明倫堂題名額俱失其名

汪岱實字柱東號石門价子負才名不遇以太學生終  
黃與堅字庭表號初菴曾祖通理字仲伯所居堂曰春  
陽學者稱春陽先生與堅少居太倉從呂雲字學張庶



常溥見而才之嘗與周肇諸人刻十子詩稿順治甲午以太倉籍選貢廷試第一丁酉登賢書己亥成進士康熙戊午舉博學鴻詞授翰林編修庚午典試貴州又督學黔省陞右春坊右贊善充講官以葬親乞歸至故里訪春陽舊居賦詩宴飲父老聚觀咸爲歎息與堅學殖深厚文歸大雅詩以性情勝著有大易正解願學齋集王遵辰曰訥菴童年穎悟詩一日文二三日卽記憶三歲能識字五歲能誦詩八歲酷好唐詩十四志于學三年讀盡周秦漢魏六朝之書

沈徵佺字子服又字堯民號松濤好蓄書多購善本所撰家乘歷二十年始成又里中紀述若干卷窮搜人物事蹟纖悉備載使江東一隅比于壯縣

王輯汝字翰臣初名雷化字葉來後又更名翊自號東臯泰際仲子順治辛卯以郡庠領鄉薦以子晦贈庶吉士著有大年堂詩文集握靈本草萬全備急方傷寒滙編醫學圖機傷寒十劑新箋諸書子晦孫敬銘自有傳侯開國曰先生內行淳茂爲文悉準先型精通醫術尤留心經濟多幹畧於民生利弊無不國曉邑事必侃侃而談待內外族及故誼最厚周急濟難之事難以枚舉及歿邑令聞而嘆曰邑中少一正人矣

朱凝祉字介繁昌生偉貌修髯好飲酒豪放不羈詩文援筆立就



馬翼字維貞號南宮順治初諸生工臨池善詞賦洋洋  
灑灑倚馬萬言已而棄文就武戊子巳丑聯捷殿試第  
一甲第三武探花及第授臨洮守備嘗駐軍略陽雪朝  
單騎入山至險僻處遇一猛虎彎弓射殺之曳歸營中  
大犒軍士遂作射虎行一篇意氣可謂豪矣及觀賽雁  
君記似仙似俠蹤跡恂恍情致纏綿異人異事妙筆寫  
出可與聶隱娘傳並傳才人之不可測如此賽鴈君者  
秦州大將軍樊夫人之養女也

翼上劉提督書自述云某六齡誦詩書十五能詞賦  
厭棄青衿請纓塞外時逆猖變亂攻陷臨鞏兩府某  
披甲守邊手刃某魁又嘗開墾屯田三萬畝照例加  
三級及至隨征西蜀奮力當先身經矢石所至披靡  
上臺屢爲紀錄其別無他技惟上馬殺賊下馬作露  
布非敢自誇實有微長乃自身中流矢之後抱病乞  
假歸臥里門風塵困頓解甲讀書究心佛老之旨溫  
習六藝之林內而身心性命之學外而韜鈴書奏之  
事以至詩詞翰墨之場亦皆遊其牆而窺其源云云  
未免過於自譽然亦足以見其梗槩

馬舒字應之號恥齋又號晏如居士元調子少承家學  
博洽羣書爲當年復社眉目鼎革後絕意進取屏迹荒  
村工古文辭康熙癸丑聘修邑志

王輔銘日元調沈邑之東隅門連阡陌床滿圖書應



之且耕且讀詩文有父風

唐懋芝字紫瑞諸生與弟懋烈齊名著有畏齋稿

唐懋烈字彥芳諸生居北城號西園灌叟性峭直觸當事怒被逮遣戍奉赦免乃北走燕趙遊覽山水歸而賦詩學圃以老所著名夢餘小草

陸琳字子玉號儼若居南翔崇禎間庠生兵後不入城市構林阜一區讀書咏詠不輟

徐雍字臨度號平谷瑄六世孫居祁岡鼎革後足跡不入城市通門後進罕識其面所居名收春亭多名人題詠與汪雲憑之二碧軒朱扶九之東岡草堂陸道協之郭西水亭吳芹中之西疇草堂朱岸先之蕉窻可以並傳不使墨妙亭春水船玉山草堂滄江風月樓獨有千古也

汪楷字雲憑號雪菴諸生專意學詩隸篆亦逼古儻僧舍以居顏曰二碧軒日與同里龐幾羽唐庶咸楊玉持陸伍時鄭西求輩諸書吟嘯其間所著晴香閣詩鈔凡三刻手自刪訂合爲一集王貞憲陸時隆諸士儼皆爲之序

東岡詩社西里則陸郭亭龐達公汪雲憑唐庶成楊玉持陸位時鄭西求東岡則徐臨度何在宮陸元中宣載錫吳旂仲朱扶九朱岸先錢介邱金赤城陸子全城則侯柅園張介修唐善長朱法五朱方賡城



南則李剩齋吳塘則王克生安亭則張朗初朱汝茨  
張維垣黃渡則浦浪臣江灣則俞仲韋外如青浦之  
朱乾一太倉之陳確菴姚襄周王上台崑山之葉岳  
心諸湛菴周元暘葉萬九諸靜先皆居停流寓往來  
社局者又邑人朱子又殷瑞符太倉陸伊程暨釋智  
操心日附詩社刻中五色陸離八音繁會其中高下  
善讀詩者自得之或推雲憑爲首恐雲憑不任受也  
至確菴之主盟評閱則有筆如椽固足以彈壓一切  
邱道登字爾先號遜齋貫通經史兼及濂洛關閩之學  
府學生由明經授鴻臚寺序班以親未葬遂解任歸當  
道聞之明建坊旌表處宗族間極敦睦任卹捐立義  
田以資族之貧者弟家甚貧乏分其產之半與之姊早  
寡家助薪水之需以全其節邑令舉爲鄉飲大賓歿後  
門人私謚文貞康熙丁未崇祀鄉賢祠

陸元輔曰道登閉戶著書其大要立心以誠敬爲主  
從躬以仁義爲先教人以孝友睦姻爲實用和不同  
流介不絕物所著有四書詳說四書正講經史淵源  
儀禮考證祠堂規制祭先定式天星垣局陰陽家寶  
素軒小草遜翁年譜諸書

侯旭字始旦號侶鶴順治諸生所居有益山閣寫心亭  
魚聽軒諸勝寄情琴奕女承恩得其傳所著有益山閣

集



何鉅字子聖號蕙洲世居婁塘性愛種花壘石構別墅  
崩霞軒以居與許自俊馬翼張銘輩結竹溪社日事吟  
詠不撤尤工小詞著有榆霞小草

陸聞陞字景遷居新涇鎮入太倉學卽諸莊甫士儼懷  
友詩中所云南渡詩人陸放翁也

嚴方來字式穀一字藹如庠生居東門有詩文集

朱頤字見心號邁菴諸生工詩詞著有蕙露齋樂府仙  
槎集南垞詩草南樓近詠吳庄紀句步崑吟曉雲詞駢  
體文共十七卷總名曰邁菴私稿

汪來許字昭茲年十五補縣校以汲古名臨池亦高妙  
有詩集改甫三十卒著有春及草堂稿

侯開國曰數年來吾邑之詩昭茲若季迺曉思似孟  
載惜皆不永年

朱川檝字濟之邑諸生父以事逮訟庭用檝爲條對始  
末遂燎燼燕衣及肌不動當事以此重之事遂解家多  
圖史好讀岐黃書庭栽花卉客至相倡和奕棋飲酒客  
退則焚香啜茗終日晏坐徐宗伯贈詩曰潮田自飽香  
杭飯藥裏兼收敗鼓皮花下有人時索酒松間無日不  
聞棋皆實錄也有嘉樹堂稿

時承字去華號萍菴光祿偕行孫邑諸生與弟來齊名  
一時有二時之口性豪奢嗜酒家產漸落復爲祝融燹  
蕩晚益貧餓居南郊室如蝸牛廬食不再身無完袴而



讀書吟詠之興不衰或謂采緩于治生急于謀道疎于教子而勤于課徒殆其然乎著有萍菴集年八十六平時白髮扶筇青燈對硯流風逸韻至今令人慨慕弗絕時炳原名來字用咸采弟九歲能文十一歲補諸生陶菴贈以詩著有周易解四書集義并倣王應麟編珠王震日抄諸編采錄經史子集稗乘不下數十萬言其壽芝堂詩文集侯開國序之子圯授敘圯授自有傳王貞字夫一邑庠生居西南里顏所居曰東籬卽以自號有詩集數卷自題曰窮者之詩

范超字同叔居黃渡業醫工詩有秋柳詩二十首人以范秋柳呼之躬耕讀書貌英偉掀髯善談笑才藻霏然

多率懷衝口而就集名青溪詩草卒年六十有二有六十生朝自述詩其族弟遺民于同叔之歿輓以詩題下小序云歲丙子子六十同叔長子二歲則同叔之年可知前人謂其甫及艾而卒誤矣

范逸字遺民號芥軒一名述字奕緒與超齊名有黃溪二范之目逸少超二歲係超族弟說見同里詩人吳拓菴友龍集中邑乘謂其不同族者謂有芥軒詩存初二集別集及四餘詩草

王輔銘曰遺民少嗜學父貿易于市嘗他出令居守遺民攜書吟誦或盜市中物不覺也久之博洽工詩聲詞曲精岐黃年未五十以盲廢猶爲童子師口授經書苦吟至夜分不倦晚年日坐小樓中作推敲勢



遺民四餘詩草自云自五十有五兩日不能視物練音注年未五十有誤程志文學傳亦誤

顧荃一各人蘭字香王黃渡布衣通經汲古尤長於賦著有顧氏春秋燬於火存者蘇齋集問槎草年四十九以侘僚失意卒

汪价曰香王善詩古文詞家無升斗學減食法口一舉火減至二三日得一飽餓而讀讀而不知其餓介性落落不能突梯貴門凡十應童子試郡邑輒前列學使每黜落卒年已及艾矣臨歿語其壻云今去再五六年又讀書矣復有何恨以破琴遺書爲殉卽以土埋不須棺也

朱奇穎字兼兩號九愚父大經字守齋萬歷乙卯副榜

奇穎年十三應試作易書三藝補邑庠生順治九年由貢生廷試授平遙縣知縣在任五年家徒壁立性孝友未仕時積館穀以贖墓地所受嗣產均之兄弟迨官晉省以道遠不獲迎母留妻王氏侍養歲輒以俸令子歸省著有周易纂註解陶錄天翼堂文集

浦鷗字浪臣號居州躬耕黃渡之陶邨村負氣寡兀論古今成敗得失張目抵掌聲振林木嘗製一大木榭時坐其中讀易語妻子曰生以此貯琴書死卽以此作棺槨其好學達觀如此陸清獻公卒汲吳淞江之六泉負之走殯所哭而奠之曰公在吾邑惟飲此水然浪臣未嘗謁公公在任時亦未知有浪臣也著有農圃考實暨



勞安集

張佳緒字貞武一字繼孫號南松又號西槎居士奉母至孝耽詩晚益清蒼風致不減劉白有晚香堂稿尤善白描山水以諸生終趙蒙泉誌其墓

龐鴻字義羽一字達公諸生居西里王泰際嘆爲郭西奇士有寄菴吟稿

張慶孫字聖奇號曾餘又號履素副憲情曾孫由嘉庠中順治甲午舉人以子大受贈翰林檢討守令高其名聘修郡志有侶蛩齋詩稿汪鈍菴蘇或齋韓慕廬咸序以行世徐曜菴其年十二口占竹枝詞琅琅可誦蓋

鳳臺云

鄭道寧字西求一名字潛民號鷗村又號一草亭十八澗中人花山髮醒吟居士棄青衫專意于詩手錄漢魏迄元明詩十卷今人詩選十八卷審釋精嚴其自運亦工得乾坤氣

金恕字中文號南居七都入崇明籍歲貢能詩文工草書著有南村集孫松坪贈詩有江左才名原獨秀漢廷經術有專師之句

張銘字西又號紫庭改名僧乙又名見一少補諸生甫壯卽謝去有田一二頃亦推與族人能詩善填詞旁通書畫篆刻之學曾居太湖濱遇盜歸故里性嗜酒又多市古鼎彝及法書名畫每棄產以酌其值緣是日貧晚



居東樂軒風雨僅蔽人無論貴賤賢愚有所請乞莫不欣然應之四壁蕭然賣書畫爲餽粥計人就而與之談冷然善也侯開國稱其一人兼數長比之沈周文彭陸治歸昌世諸人著有煮石山房稿東樂園詩駛雨閣詩尹奇字瞻三號梅岩有山居詩一千首春花詩一百首詠梅律二百首集名素心與殷又新黃海騰台刻梅花詩吳鐵菴爲之序

李聖芝字秋森一字仙照號衡霞山人流芳之孫以太倉州籍撥郡庠古今文俱工詩尤擅場詞亦成家與張西又趙蒙泉王樗園孫松坪侯鳳阿王補亭張家村爲

練川八子以才華濟其家世交滿天下入都凡鉅公之

負文望者莫不極口稱賞晚歲家居精研周易所著詩

文共四十八冊梓行者名貞壺草

聖芝才大如海懷楊首粵幕中詠榕詩至一百二十首全稿之數之多直匹放翁

俞嘉客字韋示一名諤又號逃菴性至孝工詩同殷警

齋主白沙社有三申堂草野客閒言

范光緒字公紹一字燕思築圃南村草亭竹屋與馬士延晨夕唱和著有陶村集其煙月草許潛壺序

顏鑄字懋明號日菴又號煙駕邑增生擁書萬卷博涉強記自經史外尤留心子乘僻書作爲古今文詞幽深奧竊性疎放中歲北遊一試京兆不遇卽歸閉戶散帙或經年不一出邑中儕輩罕識其面日欲無筭飲且讀



讀而更飲沉冥酣適幾不知有人以有貽續堂弟鑄  
鑄六十初度邀友至義桐軒飲酒張西又曰今邑中  
又有四先生矣侯大年問爲誰曰秋雲紫鳳謂李秋  
森聖芝黃雲沼盃張紫庭僧乙侯鳳阿開國也大年  
曰曷不云秋桐隱紫鳳爲五君子乎蓋雲沼號隱叅  
也鑄大喜貽續堂集

鑄字懋簡號竹間太學生授縣佐有別業名玉雨莊躬  
耕樂志喜爲詩歌工書法與兄鑄齊名爲陸郭亭高弟  
著有僅竹草堂集得筆齋詩集侯柅園見其書法嘆曰  
顏筋柳骨其在斯乎侯開國編其詩入吳嘯詩抄并爲  
作傳子秀洪向濬自有傳

王梓字孝移號密林太學生壯歲遊京師晚歸楊涇中  
間寓吳祭酒宅甚久性好學凡經史子集以及天文地  
理壬奇卜筮岐黃釋老等書無不搜覽晚年杜門學易  
著玩占又管窺詩有密林初二集子恪自有傳

朱昂字曉思號西宮又號鹿樵子素仲子康熙初庠生  
詩文詞賦外旁及丹青篆刻音律諸事一見輒精幼時  
曾疊小石做武侯八陣圖法以鷄置其中卽不能出又  
縮尺寸爲木牛流馬藏篋內聞奔走聲其慧悟殆不從  
人間來善飲好諧諠多狹邪之游嘗自述云人物精工  
小李畫風雲雕琢晚唐詩佳人錦帳春呼酒狎客珠樓  
夜賭碁有鹿樵吟稿早卒



王晦字服尹又字樹百號補亭泰際孫楫汝子少稟家學年十二卽以詩文名與趙俞孫致彌侯開國輩稱膠城八子年五十一始舉康熙丙子鄉試六十七成壬辰進士授庶常明年子敬銘登上第遂告歸自幼至性過人事親孝篤于友愛與人藹然可親立心又極嚴正兩在山東學幕嘗自盟于神曰苟有一私世世子孫不得與科目學使者倚以爲重於文尤長儷體詩則源本蘇陸著有齊年堂文集補亭詩鈔行世子敬銘孫元令元勲自有傳

戴鑑字冰揆號南村入太學考授州同生平遊跡頗廣歸里後緣事入獄旋得解抑鬱而卒有南村自怡稿四十卷又輯練水詩徵未竟

周宗泰字文濤縣試時吳康侯賞其文妻之以女庠姓吳補增生康熙丁卯自信必售竟被黜弟德灑字文長素請業于文濤自謂不如兄者於是科獲雋宗泰悟此事有命遂終身不踏省門棄帖括讀古香著有含一齋稿晚年尤粹于程朱家言纂四書參解嘉邑藏書之富推康侯後歸周氏

王度字賓臣號樛園明相國錫爵從孫父字子馨庠生贅南翔江氏因家焉度遷城中遊嘉庠康熙中歲貢詩名覆瓿集年八十

趙俞曰樛園浸灌典籍字義箋釋偏旁分部音韻之



切無一牴牾世未有如此之精且博者及其停蓄出  
之如瓶瀉水落紙萬言若不經思閱深奧衍世未有  
如此之敏且贍者然而躓于文戰老困一經破屋數  
間旁風上兩世未有如此之乏且困者

戴鑑曰樛園負才絕異自六經子史以及天文地理  
陰陽術數之學靡不貫串綜核有叩之者原原本本  
信口立應腹笥之富世無其偶

陸沈暘字登桑號竹菴槎里人由松江籍歲貢入太學  
勤毘王紅蘭室中昕夕吟唱相得甚南歸王首倡贈行  
以送授霍山訓導課士嚴而有恩嘗修霍志著能業堂  
詩稿春夢詞行世工新城朱秀水宋商邱尤長洲咸亟

賞之

歸梁字孟游號嵩霄又號南岑子顧曾孫性孝謹修脯  
所入悉供父與庶母甘膳終身不與諸弟言析產康熙  
乙丑選拔丁卯舉人授宜興教諭卒于官有纂補詩經  
注諸史雜抄峯秀閣集并以書法著

張大受字日容號匠門父孝廉慶孫遷長洲大受甫髫  
卯已負詩文名弱冠與郡中諸名士狎主文壇康熙庚  
午由嘉庠登賢書己丑成進士授庶常晉檢討丁酉分  
校北闈庚子典試四川旋督學貴州卒于任著有匠門  
詩文集三十卷梓以行世海內皆稱匠門先生

沈德潛曰先生未第時卽已陶成士類旣入館選汲



引尤衆吳中宏獎風流斷推匠門今歿世久過其居者猶想望餘風焉

曹澐字震城號仙客府庠生居紀王鎮遂于易尤長于詩下筆敏捷若宿構人有丐其詩者以佳釀招之必往往必醉醉則百篇可立成若富貴人具金帛求其隻字不可得也落拓不事生產南遊吳越北走幽燕好使酒罵座所如多不偶晚年厭世故寄跡琳宮梵刹年近七十赴吟社醉歸墮淵卒有仙客詩一函侯良賜爲之序張禮字儼思號醒齋邑諸生少時與從弟詩應童子試邑令趙昕聘太倉唐考功拜華校閱拔其兄弟二卷不分甲乙並列冠軍至今傳爲美談平生好爲制義三百六旬無間每日晨起至盥洗畢已成篇矣其敏捷如此子鵬翀自有傳

張詩字原雅號何菴雍正四年歲貢與兄易禮競爽一時人目爲清河三雋易字恒占號醉白有學吟草

侯萊字准樹號葦洲邑增生掌亭季子爲柘園後安貧味道有古高士風著有荷浦雜吟臆存草所選歷朝詠物詩決擇極精

沈凝字芝發號松厓武庠以一目微眇自比獨眼龍善古律賦有藝蘭齋稿

陸縉字紀雲號笏峰負文望康熙五十六年由歲貢中順天鄉試著有笏峰集



陸廷燦字扶照號幔亭南翔人由諸生例貢任宿松教諭陞福建崇安知縣能詩有松游閩游二草

朱旭字復旦居近楊家行增貢生性好遊江左右浙東西各山無不至家故饒每一出齋金儲糧或一二年或三四年始一歸著有游記

施麟瑞字玉符號篋谷康熙初恩貢司訓高淳陞宜興教諭有篋谷集仰高齋錄二十卷孫灝字冠三號荃漁以進士知桃源縣

楊志達字戴仁號勸平性高亢以不得志於省試又痛長子早歿棄家居白鶴寺十餘年著有艾深詩集

時此授字期五炳子有文行康熙中選貢壬午順天鄉試中第二著有文選旁訓子鈞班亦以能文中高魁夏時中字允其號萍鄉邑諸生居黃渡詩名不亞二范有咏物近體一卷泥美人詩三十首

楊世清字滄客諸生住槎溪著有西來集杜詩筏喻足跡遍天下吳康熙贈詩有名川岳已游及結客歷九州等句黃殿邦好游俠已而耽風雅所居有林塘園圃之勝著西湖續遊草

李雲鵬字扶九號息崖諸生年四十始學詩卽工時人以此高常侍著有燕遊草稽留草

陸宗績一名更字子定始居南里繼寓東岡有潤鴻堂集又名陶情隨筆



王恪初名慮字愚千號蕙帶泰際孫梓子居孝女里後  
隨父寓太倉贅于沈白漉受宏應太倉嘉定兩處童試  
俱冠軍督學使許汝霖令就嘉籍中康熙順天丁酉鄉  
榜戊戌成進士需次知玉田樂亭等縣復改唐縣以清  
慎稱年老告歸聘主西江豫章書院恪一生沈靜樸訥  
泊於嗜好而汲古成癖兀坐一室丹黃記註寒暑無間  
著有周易衷孔竹輿集長留山人集

秦立字雲津號芝齋邑庠生篤於天性家庭間以禮法  
自繩嗜學工文博聞強識自左國史漢八家外前賢文  
集無不遍觀而以歸震川爲根柢爲文清矯秀勁曲折  
澹蕩晚年慨邑志多舛譌廣搜博採校輯成書名練川  
野錄程侯修志實多原本焉爲人外和而內介教授生  
徒矩範整肅著作甚富歿後學者私謚愨譽先生  
侯永字聲虞康熙朝廩生開國子教授金閭及門登上  
第病羸卒年僅三十有五工詩詞旁及書畫王敬銘謂  
其詩多性靈妙悟而不越繩尺

汪來成字燕寧廩膳生爲陸清獻公弟子研精理學能  
發宋儒所未發有話雨齋詩文集子肇立邑庠生

錢麟字介邱歲貢生巢縣訓導有文名築東岡草堂於  
南橫瀝之東與唐東江輩爲詩社

石縉初名際昌字羽明號岫雲南翔人遷北城所著岫  
雲詩集吳鐵菴戴惕菴爲之序長子淙字韓莊爛翰墨



工寫生

江宏字浩如諸生駢麟有至性以詩文自家有集一卷汪三儂序之

沈元祿字雲子號錦帶居南翔始習騎射遊武庠督學鄭魚門以七圖戰命題元祿洞悉原委條對甚合公咨賞不置後改試文卽補籍生平以詩古文自豪并潛心洛閩之學所著講義糾繆洗刷朱子眉目爲聖學功臣至明德錄一書尤上接朱子五百年之心源下正千百家之誤謬功不在陸當湖下

王敬銘字丹思號未岩晦長子初好義山詩號玉谿後學東坡間倣長吉畫宗宋元人工書法康熙丁亥

鸞

輅南巡進詩畫稱旨入直暢春園纂修武英殿書成議敘不就癸巳科春鄉秋會連掇科第以進士第一人授修撰乙未會試同考官丁酉主試江西先後侍直十年甚沐寵遇巳亥父母年皆七十有四御書齊年堂額賜之丁外艱歸里尋卒著作甚見藝文考

王輔銘字翊思一字辰思號如齋又號尼民晦次子附貢生嘗爲明貢士翟校增補練音承外祖蘇涵選明代邑人詩七卷未竟之本作續練音又采國朝邑人詩爲練音初集皆梓行于世年八十三卒著有如齋吟稿

嚙語集尼民半偈詩鈔子元令自有傳李實字玉如居胡家庄幼嘗割股療親疾續文修行知



縣陸隴其試童子閱其文曰是必潛心理學者拔第一  
補諸生後得陸公指授益務實學爲入室弟子著有學  
庸順文一編以二書支分節解先隨文解意而後及其  
精微陸公深可之

胡家莊今隸寶山

金洪銓字聖宜號學山居南門外康熙甲午舉人雍正  
癸丑進士官吏部文選司主事陞稽勳司郎中提督廣  
東學政尋改任浙江温州府知府望誤歸里子鳳綸字  
翰豐鳳綸字濛若父子兄弟皆詞賦名家

顏秀洪字章霞鑽子廩貢生家多藏書皆手自丹黃與  
之談者如饑十日而享太牢也乾隆丙辰程侯修志秀  
共分纂學校著有紫雲山房集弟向溪字雲上庠生亦  
務根柢之學著有夏峰文鈔志行峻潔不求人知故顏  
氏累世有清名而不以科第顯

汪坐字雲則太學生好讀異書善鑒別古字畫鼎彝玉  
器真贗不爽廣搜歷代錢文自秦漢下迄唐宋纍纍箱  
篋中每展玩寶光爛如

趙虹字飲谷乾隆丁巳曾應鴻博放還山壯歲能以高  
談雄辨屈服衆人倦遊後意興猶豪上詩詞皆工有附  
刻于厲鶚樊榭山房集者

李夢璉字敦五號蓼園乾隆壬戌進士初除江西萬安  
令歷建昌樂安信豐臨川上高鄱陽弋陽贛縣署

贛州二府同知寧都直隸州護贛州府篆所至以廉明



稱每引斷不泥律嘗曰律設大法禮順人情人以律入情我以情入律知贛縣時鰓豁屯田浮糧萬餘兩著軍屯議條析利弊後以鯁直望誤入都起用湖北安陸縣未赴任歿于京貧不克斂侍郎金牲經紀之分典鄉試所拔皆名流善畫山水得一峯法著有觀雲樓文稿三卷子賡芸以進士累遷至嘉興知府

張錫爵字擔伯弱冠與同宗鵬翀揆方及朱厚章相酬倡補吳江庠生入成均屢困秋闈而所作詩益奇中年後絕意仕進自號鈍閑詩老卒年八十二孫璉字器之邑庠生工詩善畫有吾友于叅集

施呢宗字素如工書法氣道姿逸絕似董文敏詩則胸有洪爐金銀鉛錫皆歸鎔鑄有半岩詩草

張揆方字道營號同夫雲章之子康熙丁酉舉人選河南任縣知縣以重聽不赴著米堆山人詩文鈔行世

張宏緒字抒緒號奕堂雍正壬子順天副榜歷署沙縣仙遊浦城崇安永春州卒于長泰縣署入五侯祠

時鈞轍字若濱號西岩敘子承孫雍正壬子舉人癸丑成進士改庶常散館後授戶部主事陞郎中擢御史乙丑典試關中復出知慶陽府調鞏昌署洮泯道入覲卒于都下歷任有能聲著有西岩詩文鈔

秦倬字天采號訥菴於書無所不讀年四十八舉于鄉會試北上久留京師歷館名公卿家又曾應聘掌山東



少陵書院乾隆戊辰成進士選雲南江川縣年餘罷歸  
著述甚富有三餘錄及刪正資治通鑑補二書俱藏於  
家

王爾達字通侯號虛亭孝廉大生子鳴盛父居清河橋  
新陽籍廩生性疎直不善治產往往盜無斗儲吟咏未  
嘗輟詩以放翁後山爲師書法險勁不肯作圓軟態讀  
書好瀏覽不爲章句學多聞舊事爲門弟子談事前言  
往行衮衮不休中歲以後乃專意於教子以爲文章者  
不朽之盛事科舉之學非可以傳後也故導之以詩古  
文又以爲詞章之學可以潤身未可以言道故進之以  
經學近年來東南士大夫言古學多推嘉定而嘉定之  
好古學自王氏始

王元令字獻階號退菴晦孫輔銘子乾隆己未進士由  
刑部主事任嚴州府玉環同知太原府同知署汾州府  
知府甲子丁卯兩充浙江鄉試同考官一時名士皆出  
其門著有匏閣詩文集子喬孫太學生

秦藻字融初號信齋邑諸生爲文純簡有法中歲授徒  
極盛遊其門者皆躋巍科如族子大成擢殿撰俞昌言  
王元勳皆成進士其餘登鄉科舉明經者甚夥著有信  
齋文稿邑令程國棟作縣志時延藻與纂輯焉從兄兆  
暉字文初亦以能文名于時

趙銘字勉仁號如舟俞長孫拔貢生例選州判未就邑



令程侯聘修縣志又輯寶山縣志爲人衣冠古雅性情和藹教兩弟鏡丕烈皆孝友敦篤克成家法鑑字鑑倫號桐軒邑諸生丕烈字奇三號南塘增廣生畫宗大癡徐鑿序字俊三幼具夙慧有神童之號髫齡游庠試輒冠軍於經史騷選性理諸書皆次第手錄字如蟻螻者數十餘冊又健於爲文日構數義思如泉湧丁卯薦魁不售同人惋惜庚午秋賦卒於金陵年三十有三子玉瑛巳亥舉人

朱桓字覲晨號岡西歲貢生名重大江南北操選政者四十年著有岡西文稿膾炙人口晚主松陵書院士林說服乾隆辛卯科

欽賜舉人

王撫吉字羽昌號服謙乾隆辛酉舉人同官縣知縣工於帖括教授生徒及門多知名士王鳴盛是其高弟曹仁虎字來殷號習菴乾隆丁丑召試賜內閣中書辛巳年成進士官至侍講學士於學無所不通而詩尤妙絕一世每分韻聯句人皆爭奇鬪巧自詡絕出及見仁虎作咸退避無間言聲華名望爲都下所推有錦心繡口之日定例各官殿門對撰自翰林次由工部每歲封印後工部堂官率屬謹敬懸掛新春開印後收而謹藏之歲以爲常其軫舊者隨時更換乾隆癸未甲申間多係仁虎恭撰典重堂皇無出其右昇平故事自古罕傳足爲詞林程式丁未視學粵東卒于任葬青浦



曹娘廟港南著有詠典秦中鳴春轅韶等集

王元勳字叔華原字秀峯號易圃晦之孫乾隆丁酉舉人戊戌進士官徐州府教授天資仁厚有長者風又善自培養一言一行未嘗拂戾於人於學無不究心而尤邃於詩魏晉三唐皆挾精髓前輩自沈文愨而下咸推重之中年就衍聖公孔堯峯之聘課世子憲培館於曲阜者有年

■孔林古蹟摩挲殆遍入京又主阿文成公第教公孫侍郎尙書兩公得第後服官二十年就養西平五年年八十終於家著作繁富專刻者易圃詩鈔小樂府蒼刻者練川十二家詩江左十子詩十國宮詞五家詞湖海詩傳

嘉慶丙寅冬教授歸自西平病甚長孫女培芳割股和羹進之頓瘳次年始歿

任大椿曰叔華先生性情託爲歌詩至行孚于孝弟恬淡寡欲理趣盎然有汪洋千頃之觀有霽月光風之度道學詞章合而爲一

李庚書云曰叔華先生幼慧九歲父命賦萬壽菊詩奇之賞以松花石視視爲先生大父官翰林時 賜物及長遂以詩名大江南北詩人林立皆推先生執牛耳先生行誼高潔從不以行卷干貴人登第後改就學職不得以政事表見然每每佐有司勘災散賑捕蝗必盡心力爲之常奉檄勘沛縣太行隄戊夜水濱隄入城乃佐令集漁舟以拯居民所活甚衆後就養西平尤以加意矜恤獄囚爲訓先生之經濟于此畧



見云

汪照初名景龍字綉青號少山廩貢生少有詩名在練川十二子之列著陶春館吟稿壯歲從韓城王公杰于浙江學幕隨之入京師之陝右爲華陰山長修韓城縣志愛金石八分如臨潼張子祠堂記及修長武縣學記皆其所書晚年窮經義有齊魯韓三家詩義證大戴禮訓詁子寓泰邑庠生

俞昌言字范甄號楠園爲人蕭澹高簡少多病偕其舅氏秦大成學導引符錄之術以蘄尊生繕性乾隆乙未成進士授蘇州府教授掩關卻掃修習淨土爲業教人以道義爲先破其教者率皆名節自勵居五年卒于學舍

陳時敘字虞伯號槐庭居南翔東家有園林人稱花園陳氏時敘從幼好學嘗入市且行且讀忘路有港水失足溺焉鄉人奔救之衣履盡濕乾隆己丑成進士除安慶府教授造就人才士風大振及假歸仍以獎引後進爲已任兄時雍壬申舉人與時敘文行相切劘

林大中字協君號厚堂歲貢生自幼留心風雅嘗遇家難收捕甚急竄至松江邵秀才玘藏之經年乃免博覽羣籍邑中掌故纖悉通曉著金庭山房稿又輯練雅

王鳴韶字夔律號鶴溪住清河橋新陽縣諸生工詩畫有鶴溪賸稿其詩刻於練川十二家及江左十子中中



年以後殫精散體文極得嘉定四先生矩矱

王昶曰鶴溪爲鳳喙光祿之弟光祿移寓吳趨主盟壇坵少年簸弄硯削者爭走其門而鶴溪屏迹練祁閉門兩版端拜維誦獨抱遺經蘇文忠謂文定淳古不求人知者似也

諸廷槐字殿掄號雪堂廩貢生候選訓導性嗜書收藏之富甲於一邑居恒手不釋卷午夜猶移燈近榻擁被觀之及睡去夢魂仍在行墨間枕屏前後簡編往往堆積兼善強記歷代治亂興衰之迹瞭如指掌一切人名地名問之無不應對如流也詩筆最健詞亦婉約可風其刻于練川十二家詩江左十子詩十國官詞五家詞

者早已膾炙人口中年以後專治散體文與王鳴韶相

伯仲

袁枚廣齊廷槐家鬼魅事不足錄

程偉字不奇邑庠生幼從沈歸愚游積學不倦著有惜分書屋稿

錢塘字學淵一字禹美號澆亭工詩古文詞旣乃不復以詞人自命肆力於史之學乾隆庚子成進士官江寧府教授公務多暇刻苦撰述於聲音文字律呂推步之學尤有神解體素羸弱夏月常畏寒擁絮而攻辨精到議論風生著作詳藝文考

錢大昕曰吾邑之好學者推錢氏從姪澆亭尤羣從中之白眉也



張欽銘字若瞿號繡禪乾隆庚午舉人任安嶽天長教諭丁內艱歸歿有詭餘詩草二卷

施洞春原名達字杏賓居黃渡鎮乾隆壬申舉人癸未會試擬弟四名經魁仍被擯卒于京邸有淞陽居士集趙曉榮字陟庭廩貢生讀書具卓識經史百家皆有摘訛工駢體文詩宗儲王弟國榮字綬庭庠生工詩年二十九邁奇疾而歿

張允武字僖若號海樵居南城邑諸生詩才雄麗嘗用十年之功注查初白詩繁徵博引出於初白意計之外

初白謔處翻爲糾正

蒲褐山房詩話謂允武家望仙橋非也

錢坫字獻之塘之弟乾隆三十九年順天副榜陝西乾

州州判留心經義尤深考據之學時京師崇尚小學坫名噪一時朱學士筠翁學士方綱皆器重之畢中丞沅延入幕府旬留最久西安金石文字摩挲殆徧篆書爲海內所推與孫觀察星衍齊名晚病右手不仁以左手作古篆工妙絕倫得之者尤足珍焉著作詳藝文考金曰追字對揚歲貢生性好窮經兼講理學冗漢人訓詁以及濂洛關閩宗旨靡不究心無人主出奴之見著儀禮注疏辨訛十三經文字異同考

石球字越東居南翔潛心理學博綜經傳好閱近思錄及朱子全書增刪提綱炳燭至夜分不少輟爲人操履方正亦跌宕風流語言妙天下著有有蘭書屋存稿



周正字寧文號寄村外岡人遷方秦遊幕吳越有客游寄村二草

王有香字晉三號雪海廩膳生文詞詩賦工麗修整善楷書得顏平原法晚年病困及門爲梓其文梓甫竟而終子亦尋卒

徐文范字仲圃號虹坡太學生居錢門塘專心史學著述甚富鄉先輩王光祿錢少詹錢教授輩俱深相推服年七十卒

金慰祖字繩武號蘭岵太守洪銓之孫詩才繁富五言清遠七古排冪駸駸入古人之室拔貢入都卒于京邸

徐春和字瞻雲號省齋諸生沈潛經學貫串漢唐箋疏尤精天文推步之學爲錢少詹所許與所讀書必手加讐校遇有疑滯旁稽博考疏通證明蠅頭細書于簡編殆無餘白著作詳藝文考

朱春生字東發號惠塘孝廉桓子詩文援筆千言不加修飾而工邑中營修學廡寺觀諸公務春生身任其勞碑刻文字出其手者頗多著有讀書堂詩文集十六卷弟綿生號梅圃有吟香堂韻勝齋詩稿乾隆間與修青浦縣志季弟厚生廩膳生有閑存堂集壯年卒

時起荃字香布晚號譬翁幼慧惆儻不羈及長折節讀書入成均工行草兼繪事詩以白香山爲宗興酣落筆有不可遏抑者亦近世之奇士也



王濤字定山青山嘴人明御史敦厚王英十三世孫也  
家貧性介而能施與善詞章而務性理之學入京師名  
重公卿間王司寇昶尤所深契歷佐秦中江右滇南諸  
幕府司寇所著金石萃編一百六十卷半皆濤手輯錄  
惜其餘著述皆佚不傳

時彥英字俊求號西岡進士銘父博學工詩屢試不售  
乃習軒岐業以活人爲務求之者無富貴貧賤輒往往  
必應手而愈有勸之入胄監者彥英笑曰我願以布衣  
長揖公卿間不似世俗以浮名介意也嘉慶元年舉鄉  
飲賓著有西岡詩草四卷次子鎬字京西邑庠生文名  
與陳詩庭張彥曾相埒年未及壯而卒

陳詩庭字令華一字遵夫號妙士嘉慶四年進士性沈  
摯每治一業必鉤深詣微中年後討論經義并究六書  
之旨善畫山水工白描年四十七未及赴選而卒所著  
有說文聲義八卷讀書證疑十卷深柳居詩文集六卷  
從子珪字位三號方菴邑諸生工詩著蔚山吟草

張彥曾初名焱字蜚文號農聞又號復菴優貢生少穎  
敏體甚羸弱受業于錢少詹通經史學工小篆亦善畫  
山水與陳詩庭齊名嘗佐修寧波府志太倉州志以積  
勞患咯血卒年四十三所著有農聞菴詩鈔四卷

吳凌雲字得青號客槎歲貢生貫串經義尤精通說文  
於字尾相生之旨獨有心得能發前人所未發著十三



經考異說文形聲會元未及竟而卒

潘孝曾字子誠國學生能詩善畫早卒著有詁經小紀  
大學古訓問學日鈔續婁塘志琴書小史所見錄潘氏  
族譜

吳昭禹字襄益號稽堂邑庠生家貧學贍往往賣文以  
自給父諸生闔詩名傾吳會著十國官詞四卷注釋詮  
證引書數百種昭禹實分任之年逾壯而歿所作有稽  
堂詩文稿